



ル 5
136
2

元和郡縣圖志二



元和郡縣圖志卷第三

唐 李吉甫 撰

關內道三

涇原節度使 涇州 原州

邠寧節度使 邠州 寧州 慶州

鄜坊觀察使 鄜州 坊州 丹州 延州

涇州 安定 開元戶一萬五千九百五十二 鄉五十五

今為涇原節度使理所

管州二 涇州 原州

縣九 都管戶

墾田

禹貢雍州之域春秋時屬秦至始皇分三十六郡屬北地郡漢

凡 2
136
8



元和郡縣圖志卷第三 關內道三

分北地郡置安定郡卽此是也漢以六郡良家子補羽林郎案
六郡安定卽其一焉後漢安帝永初五年徙其人於美陽以避
羌寇郡寄理美陽在今武功縣界美陽故城是也至順帝移於
今理後魏太武神麌三年於此置涇州因水爲名隋大業三年
改爲安定郡大業末金城賊帥薛舉侵擾幽涇武德元年太宗
西討會舉死因平舉子仁杲遂改安定郡爲涇州

州境 東西一百九十六里
南北二百八十六里
八到 東南至上都四百八十里
東南至東都一千三百四十里
東北至靈州一百五十里
西北至原州平涼縣一百五十里
北至慶州三百三十里
南至鳳翔二百五十八里
東南至邠州一百八十里
西南至隴州私路一百八十里

貢賦 開元貢 龍鬚席 麻布

管縣五 保定 靈臺 臨涇 良原 潘原

保定縣 郭上 本漢安定縣地今臨涇縣安定故城也後漢省後
魏文帝大統元年自高平城移於今理屬安定郡隋開皇三年
罷郡以縣屬涇州至德二年改保定縣

涇水在縣東一里
折墟故城在縣東十里西魏涇州刺史乙弗貴所築隋末薛舉
屯據於此城舉死仁杲復竊據武德元年討平之
万俟醜奴餘趾在縣東五里醜奴高平人後魏建義元年僭號
於此

靈臺縣 州上 西至 本漢鶉觚縣屬北地郡周屬趙平郡隋開皇
三年屬涇州天寶元年改爲靈臺縣今縣理西陰密故城東接

縣城即古密國之地是也詩曰密人不恭

臨涇縣上東南至州九十里本漢舊縣屬安定郡隋大業元年於今縣

理置湫谷縣取縣內湫谷為名十二年復為臨涇縣皇朝因而

不改按縣有彭陽川去彭陽縣一百步縣界兼有漢安武安定

彭陽撫夷四縣之地

良原縣上東北至州六十里本漢三水縣地屬安定郡今安定縣界三

水故城是也隋大業元年分安定縣之地置良原縣縣西南三

十里有良原因以為名

汭水一名宜祿川西自隴州華亭縣流入

石原在縣西南即所謂良原也

潘原縣中東至州一百里本漢陰盤縣屬安定郡在今邠州宜祿縣西

二十三里陰盤故城是也地有陰槃驛

原州平涼中都督府開元戶元和戶

墾田

鄉鄉

禹貢雍州之域春秋時地屬秦始皇時屬北地郡漢為安定郡

州境

八到東南至上都八百里東南至東都一千六百六十里

東南至涇州三百二十里西至會州三百九十里

南至秦州四百六十里正西微南至臨洮軍六百二十里

北至靈州五百里

貢賦開元貢賦布鞍氈麻

管縣四 平高 平涼 百泉 蕭關

平高縣望郭下本漢高平縣屬安定郡後魏太武帝太延二年於

今縣理置平高縣屬平高郡隋開皇三年罷郡以縣屬原州大

業三年以原州爲平涼郡武德元年重爲原州縣仍屬焉

笄頭山一名崆峒山在縣西一百里卽黃帝謁廣成子學道之處史記曰黃帝東至於海西至崆峒登笄頭是也漢書曰并頭山在涇陽西禹貢涇水所出莊子云廣成子學道崆峒之山又後漢書隗囂使將王孟塞雞頭道卽此也

木峽關在縣西南四十里

蕭關故城在縣東南三十里漢書文帝十四年匈奴入蕭關殺北地都尉是也

瓦亭故關在縣南七十里卽隴山北垂隗囂使牛邯守瓦亭卽此是也

秦長城在縣北十里

朝那湫郊祀志云湫泉祠朝那蘇林云在安定朝那縣方四十里冬夏不增減不生草木旱時卽祠之以壺澗水置之於所在則雨雨不止反水於泉俗以爲恆今周迴七里蓋近代減耗監牧貞觀中自京師東赤岸澤移馬牧於秦渭二州之北會州之南蘭州狄道縣之西置監牧使以掌其事仍以原州刺史爲都監牧使以管四使南使在原州西南一百八十里西使在臨洮軍西二百二十里北使寄理原州城內東宮使寄理原州城內天寶中諸使共有五十監

南使管十八監 西使管十六監

北使管七監 東宮使管九監

監牧地東西約六百里南北約四百里天寶十二年諸監見在馬總三十一萬九千三百八十七匹內一十三萬三千五百九十八匹課馬

平涼縣上西北至州一百六十里本漢涇陽縣地今縣西四十里涇陽故

城是也後魏為長城郡長城縣之地周武帝建德元年割涇州

平涼郡於今理置平涼縣屬長城郡隋開皇三年屬原州皇朝

因之開元五年移於涇水南貞元七年又移於舊縣南坂上今

縣是也仍屯軍其中

馬屯山在縣西十六國春秋云姚萇與苻登戰於高平登敗奔

於馬屯山即此也其山南北二十里東西三十里

百泉縣上西至本漢朝那縣地故城在今縣理西四十五里

後魏孝明帝於今縣西南陽晉川置黃石縣隋煬帝改為百泉

縣武德八年移於今所

可藍山一名都盧山在縣西南七十里十六國春秋曰赫連定

據平涼登可藍山望統萬城泣曰先帝若以朕承大業豈有今

日

涇水源出縣西南涇谷地理志云涇陽縣开頭山涇水所出淮

南子云笄頭山一名薄落山故涇水亦曰薄落水又南流經都

盧山山路之中常如彈箏之聲故行旅因謂之彈箏峽

蕭關縣中南至州一百八十里本隋他樓縣大業元年置神龍三年廢別

立蕭關縣以去州闊遠御史中丞侯全德奏於故白草軍城置

因取蕭關為名

蔚茹水在縣之西一名葫蘆河源出原州西南頽沙山下

邠州新平開元戶一萬九千四百六十一鄉四十九

今為邠寧節度使理所

管州三 邠州 寧州 慶州

縣二十

禹貢雍州之域周之先公劉所居之地詩大雅云篤公劉于豳斯館是也周本紀曰后稷子不窋末年夏政衰奔戎翟之間至公劉修后稷之業乃國於豳徐廣云新平漆縣東北有豳亭是也按豳國城在今州理東北三十九里三水縣界古豳城是也自周東遷其地屬秦秦并天下分三十六郡屬內史漢屬右扶風今州理即漢右扶風之漆縣也漆水在今縣西九里西北流注於涇今鳳翔府麟遊縣東南亦有一漆水與此異也後漢於此置新平郡及姚萇之亂百姓夷滅此地郡縣並無理所至後魏又置郡焉文帝大統十四年於今理置南豳州廢帝除南字隋大業二年省入豳州義寧二年復為新平郡武德元年復為豳州開元十三年以豳與幽字相涉詔曰魚魯變文荆并誤聽欲求辨惑必也正名改為邠字天寶元年改為新平郡乾元元年復為邠州

州境 東西二百七十里 南北二百七十里

八到 東南至上都三百里 東北至東都一千一百六十里 東至坊州三百一十里 東至奉天縣一百三十里 北至寧州一百四十里 西北至涇州一百八十里

貢賦 開元貢 華豆 白蠟 麻 布 米 粟

管縣四 新平 三水 永壽 宜祿

新平縣 郭下 本漢漆縣也屬右扶風建武八年隗囂悉眾攻略陽上幸漆進止未定會馬援夜至上喜問之援聚米以為山谷於上前指軍所從入上笑曰虜在吾目中遂進兵考諸記注漢之漆縣即今州理是也姚萇之亂郡縣不立暨平後魏於今縣西南十里陳陽原上置白土縣屬新平郡隋開皇三年罷郡移

白土縣於今州城中置幽州四年改白土縣為新平縣大業二年省幽州入寧州義寧二年復為新平郡武德元年以新平郡又為幽州縣屬焉

五龍原在縣南三里原側有五泉水因名

涇水西北自宜祿縣界流入

橐邱堡在縣西十八里東西南三面石坡峭峻高十丈北面築城高二丈武德二年置貞觀七年廢

苻堅墓在縣東南二里先有謠云河水清復清苻詔死新城堅聞惡之語軍候云地名新城避之至是為姚萇殺於新平城遂葬焉

三水縣緊西南至州六十里本漢舊縣有鐵官屬安定郡以縣界有羅

川谷三泉並流故以為名魏改三水縣為西川縣亦屬安定後魏於今縣理西二十八里重置三水縣取漢舊名屬新平隋開皇三年罷郡以縣屬邠州皇朝因之

石門山在縣東五十里峯巖相對望之似門

柁邑故城在縣東二十五里即漢柁邑縣屬右扶風古郇國也左傳云畢原豐郇文之昭也

古幽城在縣西三十里公劉始都之處

永壽縣上西北至州九十里武德二年分新平縣南界於今理北三十

里永壽原西置永壽縣因原而名貞觀二年移於州東南八十里興元元年又移於順義店即今理是也本漢漆縣之南界也高泉山亦曰甘泉在縣北二十五里

涇水自新平縣界流入

醴泉苑在縣東北十里并宮並周所立後廢貞觀四年置醴泉

監兼置屯五所隸司農寺

宜祿縣中東至州八十一里本漢淺水縣地屬上郡後魏為東陰槃縣

地廢帝以縣南臨宜祿川因改名隸涇州暨周隋又為白土縣貞觀二年分新平縣又置宜祿縣復魏舊名也

淺水原即今縣理所初金城人薛舉稱兵攻破郡縣武德元年舉寇涇州屯兵於安定縣之折墘城太宗親征相守六十餘日會舉死其子仁果統其眾并羌胡十餘萬數來挑戰上遣總管龐玉自此原南出賊之右因高而陳上率大兵自原北出其不意斬首萬餘級賊大潰仁果懼而請降俘其精兵萬餘人男女五萬口故城猶在今縣北五里

陰槃城在縣西北二十五里

昭仁寺在縣西十步淺水原上王師討平仁果詔於此置寺碑諫議大夫朱子奢之詞也

長武城在縣西五十里隋開皇中築在涇河南岸武德元年廢大脣初郭子儀置兵以備西戎

寧州彭原開元戶三萬二百二十六元祐戶一千一百七鄉七十二

墾田

禹貢雍州之域古西戎地也當夏之衰公劉邑焉周時為義渠戎國其後戎翟攻太王亶父避於岐山而作周按今州理城即公劉邑地也後西伯伐犬戎武王都鎬京逐戎夷於涇洛之北以時入貢命曰荒狄周道衰荒狄不至後幽王為犬戎所殺至秦穆公得由余西戎八國來至秦昭王殺義渠戎王并其地始皇分三十六郡此為北地郡即義渠舊地也漢氏因之後漢移北地郡居富平故城是也後魏延興二年為三縣鎮孝文帝太

和十一年改置班州十四年改爲邠州二十年改邠爲豳取古地名也廢帝三年改豳州爲寧州以撫寧戎狄爲名後周改爲北地郡隋又爲寧州大業中又爲郡武德元年復爲寧州貞觀元年改爲都督府四年又廢府爲州

州境 東西二百十六里 南北五百十四里

八到 東南至上都四百五十六里 東南至東都一千三百里 東至坊州三百二十里 西至涇州一百五十里 東北至延州三百九十里 北至慶州一百三十里 南至邠州一百四十里

東至坊州三百二十里 西至涇州一百五十里 東北至延州三百九十里 北至慶州一百三十里 南至邠州一百四十里

貢賦 開元貢 龍鬚席 賦 麻 布

管縣六 定安 眞寧 襄樂 彭原 定平 豐義

定安縣 望 本漢泥陽縣在今縣理東南十五里泥陽故城是也至後魏太武帝置定安縣取定俗安人爲義在今縣理西北三里定安故關自隋開皇三年移縣入廢趙興郡理仍屬寧州皇朝因之

扶蘇墓在縣西北十八里始皇太子也監蒙恬築長城始皇崩李斯矯詔賜死葬於此

眞寧縣 縣 西北至 州 七十里 本漢陽周縣地屬上郡漢書陳餘與章邯書曰蒙恬爲秦將北逐戎人開榆中地數千里竟斬陽周謂此縣也後魏置泥陽惠涉二護軍孝文帝太和十一年復置陽周縣隋開皇十八年改爲羅川因縣南羅水爲名屬寧州皇朝因之天寶元年改爲眞寧縣

子午山亦曰橋山在縣東八十里黃帝陵在山上卽羣臣葬衣冠之處史記曰漢武帝北巡朔方還祭黃帝冢於橋山曰吾聞

黃帝不死今有冢何也或對曰黃帝已上仙羣臣葬其衣冠故有冢

襄樂縣緊西南至州六十里本漢襄洛縣地屬上郡後魏孝文帝改洛

為樂屬襄樂郡後周屬北地郡隋開皇三年改屬寧州皇朝因之

秦故道在縣東八十里子午山始皇三十年向九原抵雲陽即此道也

彭原縣緊南至州一百里本漢彭陽縣地在今縣理西南六十里臨涇

縣界彭陽故城是也暨於後漢又為富平縣之地後魏破赫連定後於此復置富平縣廢帝改為彭陽縣屬西北地郡隋開皇

三年罷郡以縣屬寧州十八年改為彭原縣因彭池為名原南北八十一里東西六十里

定平縣上北至州七十里自漢至晉並泥陽縣地後魏至周並為定安

縣地隋大業十年於此築城置棗社驛武德二年於驛分定安縣置定平縣其驛移出城北

豐義縣上東南至州八十里本漢彭陽縣地今縣理西四十里彭陽故

城是也後魏於縣理置雲州周武帝保定二年廢州為防隋文帝廢防名為豐義城武德二年分彭原縣置豐義縣因舊城為

名屬彭州貞觀元年州廢縣屬寧州

慶州順化都督府開元戶一萬七千九百八十一 鄉五十一

壘田

禹貢雍州之域古西戎地周本紀曰夏氏政衰后稷子不窋奔戎翟之間今州理東南三里有不窋故城是也春秋及戰國時為義渠戎國秦厲公伐義渠并之虜其王至始皇時屬北地郡

按今州理卽漢郁郅城也地理志屬北地郡後漢郡境爲虜所侵北地郡寄寓馮翊後魏文帝大統十一年置朔州周武帝保定元年廢朔州爲周武防隋文帝開皇三年改置合川鎮十六年割寧州歸德縣置慶州立嘉名也義寧元年爲弘化郡天寶元年改爲安化郡至德元年改爲順化郡乾元元年復爲慶州

州境 東西二百五十二里南北四百七十二里

八到 東南至上都五百七十里東南至東都一千四百三十里東北至延州四百四十里西北至靈州六百二十里東至鄜州三百九十里南至寧州一百二十七里西至原州三百四十里北至鹽州五百七十二里

貢賦 開元貢賦 牛蘇 麝香 胡布

管縣十 順化 樂蟠 馬領 合水 華池 同川

洛原 延慶 方渠 懷安

順化縣 中郭下 本漢郁郅縣後漢迄晉戎虜所侵不立州縣後魏及周以爲鎮防隋開皇十六年於今州城西南一里置合水縣在馬領白馬二水口因以爲名屬慶州大業二年以慶州爲弘化郡合水屬焉至武德六年改合水爲合川縣取隋合川鎮爲名貞觀元年改爲弘化縣天寶元年改爲安化縣至德元年改爲順化縣

不窰墓在縣東二里

樂蟠縣 中北至州三十二里 本漢略畔道地今縣理北五里略畔故城是也後漢及晉爲虜所侵逼此地無復郡縣後魏文帝於此置

蔚州周武帝置北地郡隋開皇三年罷郡以彭陽襄樂二縣屬寧州義寧元年分合水縣置樂蟠縣屬弘化郡取樂蟠城爲名

也百官表云縣有蠻夷曰道按略畔樂蟠皆指此城方言訛舛故不同耳

馬領縣中東南至州六十七里本漢舊縣屬北地郡漢末為虜所侵至後

魏為朔州之地隋大業元年分合水縣於此置馬領縣復漢縣

之舊名也十三年陷賊縣廢義寧二年於今縣理北四十里百

家堡置馬領縣屬弘化郡以縣西一里有馬領坂因名

秦長城在縣西北一百二十六里即蒙恬所築也

合水縣中西至州五十里本漢略畔道之地在今縣西南三十八里故

城是也自後漢至晉此地皆無郡縣至後魏為襄樂縣之地武

德六年分合水縣置蟠交縣以城臨大小樂蟠二水交口因以

為名天寶元年改為合水縣

華池縣下西南至州一百五十里本漢歸德縣地也按漢歸德縣今洛源

縣是隋仁壽二年於今縣東北二里庫多汗故城置華池縣因

縣西華池水為名屬慶州皇朝因之

子午山舊名翟道山在縣西四十五里

同川縣中下東至州八十里本漢郁郅縣地隋義寧三年分寧州之彭

原縣西南十五里三泉故城置三泉縣屬弘化郡武德元年改

為慶州縣屬焉仍改為同川因同川城為名

洛原縣中下東南至州二百七十五里本漢歸德縣地屬北地郡後漢更始

二年封岑彭為歸德侯謂此地也後漢迄晉無復郡縣後魏文

帝大統元年復置歸德縣隋大業元年改為洛原縣因洛水所

出為名皇朝因之

洛水原出白於山一名女郎山在縣北三十里

延慶縣中南至州四十里本漢郁郅縣地後魏於今縣理置朔州隋開

延慶縣中南至州四十里本漢郁郅縣地後魏於今縣理置朔州隋開

延慶縣中南至州四十里本漢郁郅縣地後魏於今縣理置朔州隋開

皇中改置合水縣武德六年移豐州戶住此仍分合水縣置白

馬縣以西臨白馬川水為名天寶元年改名延慶縣

方渠縣中下東南至州一百八十里古慶匡州倉在馬領川內因渠為名景

龍元年置取漢縣為名縣西北馬領山諸谷水東南流經縣所

置方渠堡因名之

懷安縣下南至州一百六十里古居近党項藩落開元十年檢逃戶初置

故以懷安為名

鄜州洛交開元戶三萬一百八十五鄉五十一

今為鄜坊觀察使理所

管州四 鄜州 坊州 丹州 延州

縣二十三 都管戶四千三百四十七

墾田

禹貢雍州之域春秋時屬秦至始皇時地屬上郡漢為上郡雕陰縣地按漢雕陰在今洛交縣北三十里雕陰故城是也暨晉陷於戎羯不置州郡苻姚置杏城鎮後魏孝文帝廢鎮改為東秦州孝明帝改為北華州廢帝改為鄜州因秦文公夢黃蛇自天降屬於地遂於鄜衍立鄜時為名隋大業初復為上郡武德元年復為鄜州貞觀二年加為都督府十六年罷府州仍舊名

立交城

州境 東西二百七十六里 南北二百七十三里

八到 東南至上都四百七十七里 東南至東都九百五十九里 東至丹州一百八十三里 南至坊州一百二十五里 西至慶州三百九十八里 北至延州一百五十里

貢賦 開元貢 龍鬚席 賦 麻 布 元和貢賦同

管縣五 洛交 洛川 三川 直羅 甘泉

洛交縣緊本漢雕陰地屬上郡雕山在西南故曰雕陰魏省上郡晉為戎狄所居苻堅時為長城縣後魏及周為三川縣隋開皇十六年分三川洛川二縣置洛交縣屬鄜州洛水之交故曰洛交皇朝因之

洛水在縣南一里

秦長城在縣東北三十里

偽夏太后城在縣西三十六里赫連勃勃聞劉裕滅姚泓命其子義真等守長安大悅自將兵入長安留太后於此築城以居洛川縣上西北至州六十里本漢鄜縣地後秦姚萇於此置洛川縣以縣界有洛川水為名後魏置敷城郡隋開皇三年罷郡以縣屬鄜州

三川縣中東北至州六十里本漢翟道縣地古三水郡以華池水黑源

水及洛水三川同會因名苻堅時於長城原置長城縣屬長城郡後魏廢帝改為三川屬中部郡隋開皇三年屬鄜州

直羅縣中下東至州一百里本漢雕陰縣地後漢因之魏省雕陰縣晉

時戎狄所居後魏置三川郡隋開皇三年使戶部尚書崔仲方築城以居之城枕羅原水其川平直故名直羅城武德三年分

三川洛交於此置縣因城為名

大槃山在縣西北一百一十里

羅川水在縣南二里

甘泉縣中下南至州七十五里武德元年分洛交縣於伏陸城置縣取城

為名天寶元年改為甘泉縣本漢雕陰縣城今在縣南四十里伏陸山在縣理東北有阿伏斤谷其水出又潛流伏川陸故號

伏陸天寶元年改為甘川谷

坊州

中部

開元戶一萬五千七百十五

元和戶一千八百四十二

墾田

禹貢雍州之域古之翟國秦屬內史漢為左馮翊翟道縣之地魏晉陷於夷狄不置郡縣劉石苻姚時於今州理西七里置杏城鎮常以兵守之後魏孝文帝改鎮為東秦州孝明帝改為北華州廢帝改為鄜州元皇帝高帝之父以周武帝時天和七年放牧於今州界置馬坊結構之處尚存武德二年高祖駕幸於此聖情永感因置坊州取馬坊為名

州境

東西三百八十九里南北一百三十九里

八到

東至上都三百五十里東至東都九百里

東南至同州二百五十里西南至邠州三百一十里

貢賦

開元貢 龍鬚席 泉 麻 弓弦麻 元和貢同

管縣四

中部

宜君

昇平

鄜城

中部縣 上 本漢翟道縣地屬左馮翊魏晉戎翟所居後秦姚興於今縣南置中部縣後魏文帝移入杏城後周改為內郡屬鄜州武德二年置坊州改為中部

杏城在縣西南五里相傳云漢將韓胡伐杏木為柵以抗北狄因以為名

宜君縣

上 東北至州一百里

前秦苻堅於葭沱縣故城置宜君護軍後

魏太武帝改為宜君縣文帝大統五年又移於今華原縣北貞觀十七年廢縣地入雍州二十年置玉華宮仍於宮所置宜君縣屬雍州永徽二年與宮同廢龍朔三年坊州刺史竇師倫奏

再置

玉華宮在縣北四里貞觀二十年奉敕營造其地本縣人秦小龍宅太宗云小龍出大龍入當時以為清涼勝於九成宮永徽二年有詔廢宮為寺便以玉華為名寺內有肅成殿永徽中奉敕令玄奘法師於此院譯經每言此寺即閻浮之兜率天也

昇平縣上東至州九十里天寶十二年刺史羅希奭奏割宜君縣西北

三鄉置去宜君縣三十五里

鄜城縣上東至州一百里本漢鄜縣地屬左馮翊後漢省後魏於今縣

理置鄜城縣屬鄜城郡隋大業元年改屬坊州

丹州咸平開元戶一萬二千四百二十二鄉三十五鄉十二

墾田

禹貢雍州之域春秋時為白翟所居隋圖經云義川本春秋時白翟地今其俗云丹州白翟

室胡頭漢舌其狀似胡其言習中夏白室即白翟後也秦置三十六郡翟語訛耳近代號為步落稽胡自言白翟後也

屬上郡漢因之魏文帝省上郡其地晉時戎狄居之苻姚時為

三堡鎮後魏文帝大統三年割鄜延二州地置汾州理三堡鎮

廢帝以河東汾州同名改為丹州因丹陽川為名領義川樂川

縣隋大業三年廢丹州於義川縣置延平縣十三年為胡賊劉

步祿所據義寧元年於義川縣置丹陽郡武德元年改為丹州

九年置都督府貞觀元年罷府為州永徽二年移於赤石川

州境東西一百九十九里南北一百七十三里

八到東南至上都五百五十里西南至上都九百二十里

東至同州三百五十里西至鄜州一百八十里

南至坊州二百六十里北至延州二百五十里

貢賦開元貢麝香蠟燭龍鬚席賦麻布元和貢同

管縣四 義川 雲巖 汾川 咸寧

義川縣上郭下本秦上郡之地二漢因之魏省上郡其地至晉為

戎狄所居後魏文帝大統三年置義川縣屬義川郡因川為名

隋大業三年廢丹州義川屬延州義寧元年於舊城復置丹陽

郡縣在城內永徽二年移於今理

雲巖縣中東南至州七十三里武德元年分義川縣置在庫利川南有雲

巖山因以為名

庫利川在縣郭南昔有奴賊居此川內稽胡呼奴為庫利因以

為名

汾川縣上西南至州七十里本秦上郡地二漢因之魏省上郡後魏孝

文帝置安平縣理薛川屬樂川郡文帝改安平為汾川隋開皇

三年罷郡縣屬丹州大業二年屬延州武德元年復屬丹州

黃河在縣東七里河岸頓狹狀似槽形鄉人呼為石槽蓋禹治

水鑿石導河之處石槽長一千步闊三十步懸水奔流龍鼉魚

鼈所不能游

咸寧縣中下西南至州四十五里本秦上郡之地後魏孝文帝太和十八

年於白水川置永寧縣屬義川郡在今縣東二十里永寧故縣

是也文帝改為太平縣移於今所隋開皇三年罷郡屬丹州十

八年改太平縣為咸寧以界內有咸寧鎮為名

延州延安望中都督府開元戶一萬六千三百四十五 鄉六十八

元和戶九百三十八 鄉十八

墾田

禹貢雍州之域春秋時白翟所居秦置三十六郡屬上郡在漢

為上郡高奴縣之地今州理即上郡高奴縣之城也項羽三分

秦地以董翳為翟王都高奴即其地也魏省上郡至晉陷為戎

狄其後屬赫連勃勃後魏滅赫連昌以屬統萬鎮孝文帝置金明郡宣武帝置東夏州廢帝改為延州以界內延水為名置總管管丹延綏三州隋開皇八年廢總管但為延州煬帝以為延安郡隋氏喪亂陷於賊寇武德元年百姓歸化置總管府開元二年為都督府尋罷府為州

州境東西四百四十九里南北三百五十一里

八到西南至上都六百七十四里東南至東都一千一百里東至隰州三百六十里西至鄜州一百五十里西南至慶州四百四十里西北至夏州四百里

貢賦開元貢 蜜蠟 麝香 賦 麻 布 元和貢賦同

管縣十 膚施 延長 臨真 金明 豐林 延川

敷政 延昌 延水 門山

膚施縣上郭下本漢舊縣屬上郡趙武靈王滅中山遷其王於膚施漢書曰匈奴南侵至朝那膚施即其處也魏晉陷戎狄隋煬帝大業二年分豐林金明二縣於此置膚施縣復舊名也屬延安郡皇朝因之

縣有五龍山帝原水黃帝祠

清水俗名去斤水北自金明縣界流入地理志謂之清水其肥

可然鮮卑謂清水為去斤水斤一作筋

延長縣中東至州一百三十里本秦膚施縣地後魏廢帝元年於丘頭原

置廣安縣隋仁壽元年以廣字犯皇太子名改為延安大業末

廢貞觀六年又置移於府北去斤川今縣是也廣德二年改為

延長

臨真縣中西北至州一百四十里本漢高奴縣地後魏文成帝置臨真縣

屬偏城郡周武帝天和元年稽胡叛攻破郡城遂移於今理隋
開皇元年改爲臨真縣屬延安郡皇朝因之

金明縣中東南至州四十八里本漢高奴縣地後魏太武帝於此置廣洛

縣屬金明郡隋開皇四年屬延州後仁壽元年以太子名廣改
爲金明縣大業十三年省入膚施縣武德六年又分置金明縣

豐林縣中下西至州三十里本漢高奴縣地後魏孝文帝置廣武縣屬

偏城郡在今理東四十里周宣帝改爲豐林屬延州皇朝因之
琉璃山在縣北十五里

延川縣中西南至州一百八十里本秦臨河縣地漢不改後漢省後魏分

安人縣於此地置文安縣隋文帝改爲延川取吐延川爲名皇
朝因而不改

吐延水北自綏州綏德縣流入

敷政縣中下東北至州一百五十里本漢高奴縣地後魏太和初置因城名
縣隋開皇六年於其中置金城鎮武德二年移縣就鎮因改爲

金城縣天寶元年改敷政

延昌縣中南至州一百七十六里本漢高奴縣地隋開皇三年於此置朔

方鎮十年以北有朔方鎮遂廢貞觀九年置罷交鎮十年又置
罷交縣屬延州取城北罷交谷爲名天寶元年改爲延昌縣

塞門鎮在縣西北二十里鎮本在夏州寧朔縣界開元二年移
就蘆子關南金鎮所安置

蘆子關屬夏州北去鎮一十八里

延水縣中下西至州二百一十五里本秦臨河縣之地史記秦滅六國使蒙

恬北擊匈奴悉收河內地因河爲塞築四十四縣城臨河徙謫
吏以戍之漢因之在今縣理北十五里臨河故城是也後魏於

其中置安人縣并安人鎮屬東夏州隋文帝廢鎮置安人戍武德二年重置安人縣屬延州貞觀二十三年改爲延水縣取吐延水爲名

黃河在縣東八里

門山縣中西至州二百五十里本漢定陽縣地周宣帝大象元年分汾州

雲巖二縣於今縣南六里置北有山形似門因以爲名武德八年於今縣北五里宋斯堡置屬丹州廣德二年割屬延州

黃河在縣東三十五里

元和郡縣圖志卷第三終

元和郡縣圖志卷第四

唐 李吉甫 撰

關內道四

靈武節度使 靈州 會州 鹽州

夏州節度使 夏州 綏州 銀州 宥州

振武節度使 單于都護府 東受降城 麟州 勝州

豐州都防禦使 天德軍 中受降城 西受降城

靈州 靈武大都督府 開元戶九千六百六 元和戶 鄉二十七

今爲靈武節度使理所

管州三 靈州 會州 鹽州

縣十

禹貢雍州之域春秋及戰國屬秦秦并天下爲北地郡漢時爲

富平縣之地後漢安帝永初五年西羌大擾詔令郡人移理池陽順帝永建四年歸舊土其城赫連勃勃所置果園今桃李千餘株鬱然猶在後魏太武帝平赫連昌置薄骨律鎮後改置靈州以州在河渚之中隨水上下未嘗陷沒故號靈州周置總管府隋大業元年罷府為靈州三年又改為靈武郡武德元年又改為靈州仍置總管七年改為都督府開元二十一年於邊境置節度使以遏四夷靈州常為朔方節度使理所朔方節度 管兵六萬四千七百八人馬二萬四千三百匹衣賜二百萬匹段

統經略軍 靈武郡城內管兵二萬七百人馬三千匹

靈武軍 靈武郡西黃河外一百八十餘里萬歲通天初置管兵八千人馬一千三百匹

定遠東城 靈武郡東北一百里黃河外景龍中韓公張仁愿置管兵七千人馬三千匹

西城 九原郡北黃河外八十里景龍中韓公張仁愿置管兵七千人馬一千七百匹西南去理所一千餘里

安北都護府 亦曰中受降城景龍中韓公張仁愿於黃河北岸置管兵六千人馬二千匹西南去理所一千三百里

振武軍 單于都護府城內天寶中王忠嗣置管兵九千人馬一千六百匹西南去理所一千七百里

天寶元年又改為靈武郡至德元年肅宗幸靈武即位昇為大都督府乾元元年復為靈州

州境 東西五百八十里 南北八十里

八到 東南至上都一千二百五十里 東南至東都二千二百七十里

東南至鹽州三百里
東南至慶州六百二十里

西南至涼州九百里
北至磧南彌娥川水一千里

貢賦

開元貢

甘草 青蟲子 鹿皮 紅花 野馬皮
烏翎 鹿角膠 雜筋 麝香 花菴蓉
赤檉 馬鞭

管縣六 迴樂 靈武 保靜 懷遠 鳴沙 溫池

定遠城廢

迴樂縣

望郭下

本漢富平縣地屬北地郡在今縣理西南富平故

城是也後周置迴樂縣枕黃河後魏刁雍為薄骨律鎮將上表

請開富平西三十里艾山舊渠通河水既公私田四萬餘頃人

大獲其利孝文太和七年雍又上表論漕運奉詔平高安定統

萬平高今屬原州安定今涇州統萬今夏州及臣所守四鎮出車五千乘運穀五十

萬斛付沃野鎮以供軍糧臣鎮去沃野鎮八百里道多深沙輕

車往來猶以為難今載穀二十五斛每至深沙必致滯陷又穀

在河西轉至沃野越渡大河計五千乘運十萬斛百餘日乃得

一返大廢生人耕墾之業車牛艱阻難可全至一歲不過二運

五十萬斛乃經三年臣聞鄭白之渠遠引淮海之粟汭流數千

里周年乃得一至猶稱國有儲糧人用安樂今求於嬾岷山在

原州平高縣即今筭頭山今在語訛亦曰沂屯山即嬾岷

河水之次造船二百艘二船為一舫

一舫乘二千斛一舫十人計須千人臣鎮內之兵卒皆習水一

運二十萬斛方舟順流五日而至自沃野牽上十日還到合六

十日得一返從三月至九月三返運送六十萬斛計用人工輕

於車運十倍有餘不費牛力又不廢田孝文帝善之下詔曰非

但一運自可承以為式

溫泉鹽池在縣南一百八十三里周迴三十一里

薄骨律渠在縣南六十里溉田一千餘頃

安樂川在靈州南稍東一百八十里

長樂山舊名達樂山亦曰鐸洛山以山下有鐸洛泉水故名舊吐谷渾部落所居今吐蕃置兵守之

靈武縣上東南至州十八里本漢富平縣之地後魏破赫連昌收胡戶

徙之因號胡地城天和中於此州東北置建安縣隋開皇十八年改爲大潤縣仁壽元年改爲靈武縣移入胡地城安置

黃河自迴樂縣界流入

千金陂在縣北四十二里長五十里闊十里

漢渠在縣南五十里從漢渠北流四十餘里始爲千金大陂其左右又有胡渠御史百家等八渠溉田五百餘頃

保靜縣上西南至州六十里本漢富平縣地後魏立弘靜鎮徙關東漢

人以充屯田俗謂之漢城隋改置弘靜縣神龍元年改爲安靜至德元年改爲保靜

賀蘭山在縣西九十三里山有樹木青白望如駁馬北人呼駁爲賀蘭其山與河東望雲山形勢相接迤邐向北經靈武縣又西北經保靜西又北經懷遠縣西又北經定遠城西又東北抵河其抵河之處亦名乞伏山在黃河西從首至尾有像月形南北約長五百餘里真邊城之鉅防山之東河之西有平田數千頃可引水溉灌如盡收地利足以贍給軍儲也

懷遠縣上南至州一百二十五里在州東北隔河一百二十里本名飲汗

城赫連勃勃以此爲麗子園後魏給百姓立爲懷遠縣其城儀鳳二年爲河水汎損三年於故城西更築新城

縣有鹽池三所隋廢紅桃鹽池鹽色似桃花在縣西三百二十

里武平鹽池在縣西北一十二里河池鹽池在縣東北一百四十五里

廢靈武城在縣東北隔河一百里其城本蒙恬所築古謂之渾懷障卽渾懷所理道故謂之靈武

新堡在縣西北四十里永昌元年置堡內安置防禦軍二千五百人糧五萬石舊名千金堡今名新堡

鳴沙縣上 東北至州一百二十里本漢富平縣地屬安定郡在今縣理東

二百里原州周保定二年於此置會州建德六年廢郡立鳴沙鎮隋開皇十九年置環州以大河環曲爲名仍立鳴沙縣屬焉

大業三年罷環州以縣屬靈武郡貞觀六年復置環州九年州廢以縣屬靈州神龍二年冬爲默啜所寇因而荒廢遂移縣於廢豐安城卽今縣理是西枕黃河人馬行經此沙隨路有聲異

於餘沙故號鳴沙

溫池縣上 西北至州一百八十里神龍五年置縣側有鹽池

定遠廢城在州東北二百里卽漢北地郡方渠縣之地先天二年郭元振以西城遠闊豐安勢孤中間千里無城烽埃杳渺故置此城募有健兵五千五百人以鎮之其後信安王禕更築羊馬城幅員十四里

經畧軍在夏州西北三百里天寶中王忠嗣奏於榆多勒城置軍今屬靈武節度本屬夏州南去靈武六百五十餘里元和九年於此城新置宥州

會州會靈 開元戶三千五百四十 鄉六 下府 元和戶

禹貢雍州之域古西羌地周太祖爲西魏相來巡會師於此土人張信罄資饗六軍太祖悅因命置州以會爲名周武帝保定

二年廢州改爲會寧防隋開皇元年改防爲鎮武德二年討平李軌置西會州貞觀八年以此州倉儲殷實改爲粟州其年又爲會州天寶元年改爲會寧郡乾元元年復爲會州

州境東西五百一十里南北三百三十里

八到東南至上都一千一百九十里東南至東都一千五百里

東南至原州三百九十里西南至蘭州三百八十里

西北至涼州五百四十里東北至靈州五百三十里

貢賦開元貢覆鞍氈

管縣二 會寧 烏蘭

會寧縣上本漢鶉陰縣地周太祖置會寧縣屬會州隋大業二

年改爲涼川縣武德二年又改爲會寧

黃河堰開元七年河流漸逼州城刺史安敬忠率團練兵起作

拔河水向西北流遂免淹沒

會寧關東南去州一百八十里

河池西去州一百二十里其地春夏因雨水生鹽雨多鹽少雨

少鹽多遠望似河故名河池

烏蘭縣上東南至州一百四十里本漢祖厲縣地屬安定郡後漢屬武威

郡前涼張軌收其縣人於涼州故武威縣側近別置祖厲縣周

武帝西巡於此置烏蘭關又置縣在會寧關東南四里舊城內

沙石不堪久居天授二年移於東北七里平川置

鹽州五原開元戶三千二十五鄉七

禹貢雍州之域春秋爲戎狄所居地史記梁山涇漆之北有義

渠胸衍謂此也及始皇并天下屬梁州漢武帝元朔二年置五

原郡地有原五所故號五原至晉地沒赫連勃勃後魏平之改

爲西安州以其北有鹽池又改爲鹽州隋大業三年爲鹽川郡
貞觀二年討平梁師都置鹽州天寶元年改爲五原郡乾元元
年復爲鹽州

州境東西二百四十八里
南北二百七十里

八到南至上都一千五百里
東至東都一千七百三十里
東北至經略軍四百里
南至慶州四百五十里
西北至靈州三百里

貢賦西北取烏池黑浮圖堡私路至靈州四百里
開元貢 鹽山四十顆

管縣二 五原 白池

五原縣上本漢馬領縣地貞觀二年與州同置五原謂龍游原
乞地千原青領原可嵐貞原橫槽原也

鹽池四所一烏池二白池三細項池四瓦窰池烏白二池出鹽
今度支收糶其瓦窰池細項池並廢

白池縣上南至景龍三年勅置以地近白池因以爲名

夏州朔方 開元戶六千一百三十二 鄉二十
中都督府 元和戶三千一百 鄉八

今爲夏州綏銀節度使理所

管州四 夏州 綏州 銀州 宥州新置

縣十二

禹貢雍州之域春秋及戰國時屬魏秦并天下置三十六郡屬
上郡漢武帝分置朔方郡後漢建武二十年罷二十七年復置
靈帝末羌胡爲亂塞下皆空至晉末赫連勃勃於今州理僭稱
大夏勃勃字屈子一作屈丐朔方匈奴人父衛辰苻堅時爲西單于
遂有朔方之地辰後爲後魏所殺勃勃殺高平沒奕於并其眾
自稱天王於朔水之北黑水之南營起都城卽今州理是也名

曰統萬城至子昌為魏太武帝所滅置統萬鎮孝文帝太和十一年改置夏州隋大業元年以為朔方郡隋末為賊帥梁師都所據貞觀二年討平之改為夏州置都督府天寶元年改為朔

方郡乾元元年復為夏州

州境東西二百一十五里南北七十里

八到東南至上都一千五十里東南至東都一千八百五十里東至銀州一百八十里東南至延州四百里西南至鹽州三百里西北至豐州七百里

貢賦開元貢角弓氍毹酥拒霜薺賦疏布

管縣四 朔方 德靜 寧朔 長澤

朔方縣上郭下本漢舊縣今縣理北什賁故城是也漢末荒廢後

魏更置巖綠縣隋因之貞觀二年改為朔方縣

契吳山在縣北七十里十六國春秋曰赫連勃勃北游契吳歎曰美哉臨廣澤而帶清流吾行地多矣自馬領以北大河以南未之有也

無定河一名朔水一名奢延水源出縣南百步赫連勃勃於此水之北黑水之南改築大城名統萬城今按州南無奢延水唯無定河即奢延水也古今異名耳

烏水出縣黑澗東注奢延水本名黑水避周太祖諱改名烏水初統萬城成勃勃下書曰今都城已建宜立美名朕方統一天下君臨萬國宜以統萬為名其城土色白而牢固有九堞樓峻險非力可攻酈道元云統萬城蒸土加功雉堞雖久崇墉若新什賁故城在縣理北即漢朔方縣之故城也詩所謂王命南仲城彼朔方是也漢武帝元朔二年收河南地置朔方五原郡使

校尉蘇建築朔方公孫弘數諫以為罷做中國以奉無用之地願罷之上使朱買臣難弘發十策弘不得一由是卒城之亦謂此也自漢至今常為關中根本什賁之號蓋蕃語也城西南有二鹽池大而青白青者名曰青鹽一名戎鹽入藥分也

故白城一名契吳城在縣北一百二十五里契吳山赫連中因山所築勃勃嘗所歎美故其子昌因立此城以立勃勃之廟

勃勃墓在縣西二十五里隋置白城鎮後廢

德靜縣中下西南至州八十里蓋漢朔方縣池周武帝於此置彌渾戍南有彌渾水因名隋改為德靜鎮尋廢鎮為縣皇朝因之

無定河自朔方縣界流入

秦長城在縣西二里

寧朔縣中下西北至本漢朔方縣地周於此置寧朔縣屬化政郡隋罷郡以縣屬夏州皇朝因之

賀蘭山在縣東北三十里

秦長城在縣北十里

長澤縣中下東北至本漢三封縣地屬朔方郡即今縣北二十里三封故城是也後魏於此置長澤縣屬闡熙郡隋罷郡以縣屬夏州皇朝因之

闡熙故城在今縣西南二十里

百井戍在縣南八十里勃勃與秃髮儁檀戰處

胡洛鹽池在縣北五十里周回三十里亦謂之獨樂池聲相近也漢有鹽官

綏州上郡開元戶八千七百十五鄉二十八
下元和戶八百四十二鄉一十二

禹貢雍州之域春秋時其地為白翟所居七國時屬魏史記曰

魏有西河上郡秦并天下始皇置三十六郡為上郡漢高帝元年項羽立董翳為翟王後廢復為上郡漢武帝徵六郡良家子為羽林郎上郡即其一也按秦上郡城在今州理東南五十里上郡故城是也自後漢末已來荒廢年久俗是稽胡及赫連勃勃都於統萬上郡之地又為赫連部落所居後魏明帝神龜元年東夏州刺史張邵於此置上郡廢帝元年於郡內分置綏州隋煬帝又改為上州後又改為雕陰郡以雕山在西南故名隋亂陷賊武德三年百姓歸化遂於延州豐林縣置綏州總管貞觀二年討平梁師都廢府移州於今理

州境

東西二百一十九里
南北三百一十八里

八到

西南至上都一千里
東南至東都一千四百里
東至石州二百七十里
西至夏州三百六十里

西南至延州二百三十里
西北至銀州一百六十里
東北至太原五百九十里

貢賦

開元貢蠟
賦布麻

管縣五 龍泉 延福 綏德 城平 大斌

龍泉縣

中下本秦膚施縣地二漢同後魏於此置上縣取郡為

名隋開皇三年上縣屬綏州大業二年改綏州為上州又改為

雕陰郡上縣咸屬焉皇朝因而不改天寶元年改為龍泉

疏屬山亦名雕陰山即山海經云貳負之臣曰危與貳負殺竇

窳帝乃楛之疏屬山即此也

無定河一名奢延水自銀州撫寧縣界流入

州城貞觀元年築實中四面石崖東面高八十尺西面高一百四十尺南面高四十尺北面高一百二十尺周迴四里二百步

上郡故城在縣東南五十里始皇使太子扶蘇監蒙恬於上郡
卽此處也

吳兒城在縣西北四十里初赫連勃勃破劉裕子義真於長安
遂虜其人築此城以居之號吳兒城

延福縣中下西至州一百一十里本秦膚施縣地後魏置延陵縣理延陵

村隋文帝改為延福皇朝因之

綏德縣中下北至州一百里本秦上郡之地二漢不改魏省上郡後魏

文帝分上郡南界邱尼谷置綏德縣隋不改皇朝因之武德二
年移於吐延水北卽今理是也

城平縣中下東北至州一百里本秦膚施縣二漢不改後魏孝明帝於今

縣理西三十里庫仁川置城中縣隋改為城平縣自庫仁川移
於今理屬上郡皇朝因之

大斌縣中下東至州一百一十里本秦膚施縣之地後魏孝明帝神龜元

年於今縣東五里置大斌縣屬上郡周隋不改武德七年於今
城平縣界魏平故城改置因隋舊名大斌者取稽胡懷化文武

雜半之義

銀州銀川下開元戶六千一百二十鄉十九

禹貢雍州之域春秋時屬白翟地秦并天下始皇分三十六郡
屬上郡漢為西河郡囿陰縣之地晉十六國時為戎狄所居苻
秦建元元年自驄馬城巡撫戎狄其城卽今州理城是也周武
帝保定二年分置銀州因谷為名舊有人牧驄馬於此谷虜語
驄馬為乞銀隋大業二年廢銀州縣屬雕陰郡隋末陷於寇賊
貞觀二年平梁師都於此重置銀州天寶元年為銀州郡乾元
元年復為銀州

元和郡縣志卷四

州境東西二百七十一里
南北三百二十八里

八到西南至上都一千六百里
東南至東都一千四百里
東至石州界黃河一百六十里
西至夏州一百八十里
東南至綏州一百六十里
東北至麟州三百里

貢賦開元貢
賦
麻布
粟
女稽布

管縣四 儒林 眞鄉 開光 撫寧

儒林縣中下 本漢圖陰縣地以其在圖水之陰故名隋開皇三年於此置儒林縣屬銀州大業二年廢銀州以縣屬雕陰郡貞觀二年重置銀州縣又屬焉

無定河自夏州界流入

眞鄉縣中下 西至州一百里 漢圖陰縣地周武帝保定二年置今縣屬

銀州皇朝因之

茹蘆水源出縣理西北

開光縣中下 西南至州二百里 漢圖陰縣地周武帝保定二年於今縣理

置開光郡宣帝大象二年廢郡置開光縣屬撫寧郡隋開皇三

年罷郡以縣屬銀州皇朝因之

撫寧縣中下 北至州八十里 本漢圖陰縣地後魏廢帝於縣東撫寧故

城置撫寧縣屬撫寧郡隋開皇三年廢郡以縣移於今理屬銀

州皇朝因之

無定河在縣北二十里

廢宥州在鹽州東北三百里
在夏州西北三百里 開元二十六年置寶應已後廢事

本末具新宥州

新宥州上 本在鹽州北三百里初調露元年於靈州南界置魯

麗舍塞依契等六州以處突厥降戶時人謂之六胡州長安四

年併爲匡長二州神龍三年復置蘭池都督府在鹽州白池縣北八十里仍分六州各爲一縣以隸之開元十一年康待賓叛亂剋定後遷其人於河南江淮諸州二十六年還其餘党遂於此置宥州以寬宥爲名也後爲靈朔郡領縣三懷德延恩歸仁天寶中宥州寄理經略軍寶應已後因循遂廢由是昆夷屢來寇擾党項靡依元和八年冬回鶻南過磧取西城柳谷路討吐蕃西城防禦使周懷義表至朝廷大恐以爲回鶻聲言討吐蕃意是爲寇唯中書侍郎平章事李吉甫以爲回鶻入寇且當斷絕和事不應便來犯邊今之多士居平則橫生異議深沮邊計及聞邊警又承虛聲以洵朝廷冀因幾危搖動時事但當設備不足爲慮因請自夏州至天德軍復置廢館一十一所以通急驛又請夏州騎士五百人營於經略故城應援驛使兼護党項

部落上悉從之又上言曰國家舊置六胡州在靈州界內開元中廢六州置宥州以領諸降戶天寶末宥州寄理於經略軍蓋謂居中可以總統蕃部北接天德南據夏州今經略軍遠礙靈武道路乖越又不置軍鎮非舊制也請置宥州理經略軍至九年五月詔復於經略軍城置宥州仍爲上州於州郭下置延恩縣爲上縣改隸夏綏銀觀察使取鄜城神策行營兵馬使鄭杲下兵士并家九千人以實經略軍又置州之日版築之下掘得釜二百五十四口悉堪烹飪識者以爲暗合前賢之規模亦足以彰玄化之所感也其釜並散給諸營以資軍用又頃年每有回鶻消息常須經太原取驛路至闕下及奏報到已失事宜今自新宥州北至天德置新館十一所從天德取夏州乘傳奏事四日餘便至京師

州境

八到

東南取夏州路至上都一千三百里
東南至東都二千一百里
東南至夏州三百二十里
西南至廢宥州三百里
東至麟州六百里
西南至靈州六百五十里
東北至中受降城五百六十里
南至鹽州六百里

單于大都護府

今為振武節度使理所

管府一城一州二 單于大都護府 東受降城 麟州

勝州

縣六

本漢定襄郡之盛樂縣也後魏都盛樂亦謂此城武德四年平突厥於此置雲州貞觀二十年改為雲州都督府麟德元年改為單于大都護府垂拱二年改為鎮守使聖曆元年改置安化

都護開元七年隸屬東受降城八年復置單于大都護府

府境

八到

西南取太原路至上都一千九百二十里
東南至東都一千七百里
東南至河界靜邊軍一百二十里
南至朔州三百五十里
西南至東受降城一百二十里
北至黑砂磧口七百里

管縣一 金河

金河縣中郭下天寶四年置初景龍二年張仁愿於今東受降城

置振武軍天寶四年節度使王忠嗣移於此城內置縣曰金河
即後魏什翼犍所都盛樂之地道武帝遷都平城則今雲州所
理是也

麟州

新秦 天寶戶
元和戶

禹貢雍州之域秦漢為雲中郡隋開皇二十年置榆林縣改為

勝州天寶元年王忠嗣奏割勝州連谷銀城兩縣置麟州

州境

東西南北 西南至上都一千四百六十里

八到 東南至東都一千五百一十里

東至嵐州一百八十里
東至嵐州界黃河一百二十里河上有合水關
東北至勝州四百里
西南至銀州三百里

貢賦

管縣三 新秦 連谷 銀城

新秦縣 中郭下 初漢武帝徙貧人於關中以西及朔方以南謂之

新秦天寶元年置以為縣取漢舊名也

連谷縣 中下南至 本漢固陰縣地屬西河郡在今銀州儒林

縣界隋文帝於此置連谷鎮煬帝改為連谷戍大業十三年廢

戍貞觀八年於廢戍置連谷縣屬勝州天寶元年割屬麟州

連谷鎮縣理城中貞觀八年置

銀城縣 中下北至 本漢固陰縣地屬西河郡漢末大亂匈奴

侵邊雲中西河之間其地遂空訖於魏晉不立郡縣後魏時置

石城縣廢帝改為銀城關周武帝保定二年移於廢石龜鎮城

即今縣理是也貞觀因之屬勝州天寶元年屬麟州

勝州 榆林開元戶四千九十五 鄉十三

禹貢雍州之域春秋為戎狄地戰國時為晉趙地地理志云雲

中立五原本戎狄地趙有之始皇時分三十六郡為雲中郡漢

因之不改按漢雲中在今州理東北四十里榆林縣界雲中故

城是也漢末大亂匈奴侵邊其城遂空晉末屬赫連氏 赫連勃

都於統萬按統萬城在今州 後魏太武帝平赫連昌之後訖於

理西南八百里夏州是也

周代往往置鎮不立郡縣隋文帝開皇三年於此置榆林關七
年又置榆林縣屬雲州二十年割雲州之榆林富昌金河三縣
置勝州立嘉名也煬帝大業五年以勝州為榆林郡領榆林富
昌金河三縣十五年郡人郭子和以城入突厥武德四年郭子
和歸國其地又陷梁師都貞觀二年平師都三年仍隋舊理置
勝州時柴紹劉蘭破滅匈奴奪得河南之地因置州以決勝為
名

州境東西南北

八到西南至上都一千八百五十三里
東南至東都一千九百四十里

西南至麟州四百里
西南至夏州九百里

南至銀州七百里
北至豐州七百里

貢賦開元貢 女 稽布 麻 粟

管縣二 榆林 河濱

榆林縣中下本漢沙南縣地屬雲中郡漢末北虜侵擾歷魏晉

周此地皆無縣邑隋開皇七年置榆林縣地北近榆林即漢之

榆溪塞因名屬雲州二十年改屬勝州皇朝因之

黃河西南自夏州朔方界流入

大葭蘆水縣西二百二十里

小葭蘆水縣西二百四十里其間地甚良沃

平河水首受黃河隋文帝開之以通屯倉

金河泊在縣東北二十里周迴十里

雲中故城在縣東北四十里趙雲中城秦雲中郡也史記曰趙

武靈王北破林胡樓煩所置秦因之

隋榆林宮在州城內大業二年置因榆林郡為名其年煬帝北

巡陳兵塞表以威北狄因幸此宮突厥啟人可汗獻馬及兵器
新帳因賦詩云云

榆林關在縣東三十里東北臨河秦卻匈奴之處隋開皇三年
於此置榆林關

河濱縣中本漢沙南縣地屬雲中郡訖於魏晉此地不立縣邑

至後魏及周復為銀城縣地隋時復為榆林縣地貞觀三年於
此置河濱縣東臨河岸因以為名改雲州為威州立嘉名也八
年廢威州以縣屬勝州

黃河在縣東一十五步闊一里不通船楫即河濱關渡河處名
君子津

河濱關在縣東北貞觀七年置

豐州九原開元戶一千九百鄉五

今置都防禦使

管州一軍一城二 豐州 天德軍 西受降城 中受降

城二

縣二

其都防禦使及天德軍使理在西城今移理舊天德軍城
禹貢雍州之域秦上郡之北境秦末沒胡漢武帝元朔二年使
衛青逐去匈奴開置朔方領縣十理三封在今豐州西一百里
後漢因之靈帝末羌胡擾亂城邑皆空永嘉後匈奴衛辰父子
新居其地辰子赫連勃勃自稱大單于統萬城地屬勃勃後魏
太武帝擒滅赫連昌置統萬鎮孝文帝改置夏州其地又為夏
州之北境周武帝於今永豐縣置永豐鎮隋文帝開皇三年於
鎮置豐州後廢貞觀四年突厥降附又權於此置豐州都督府

不領縣唯領蕃戶以史大奈為都督十一年大奈死復廢府以地屬靈州二十二年又分置豐州永徽九年於州復重置永豐縣四年於郭下又置九原縣麟德元年又置豐安縣天寶元年改為九原郡乾元元年復為豐州

州境

八到

南至上都一千八百里
南至東都一千二百九十里
東至勝州五百三十里
西南至靈州九百里
東南至夏州七百五十里
西北至河西城八十里

貢賦 開元貢 野馬皮 布 麻

管縣二 九原 永豐

九原縣 中下 本漢之廣牧舊地中部都尉所理其九原縣永徽四年重置其城周隋間俗謂之甘草城

永豐縣 中下 本漢臨戎舊地後漢末廢北人又謂之賀

葛真城周武帝保定三年於此置永豐鎮隋開皇五年廢鎮置

永豐縣武德六年省永徽元年復置

廢豐安縣在州東南四十里隋開皇六年於縣置豐安鎮麟德

元年改為豐安縣天寶末廢

天德軍

舊理在西受降城權置軍馬於永清柵元和九年詔移理舊城 本安北都護貞觀二十

一年於今西受降城東北四十里置燕然都護以瀚海等六都

督阜蘭等七州並隸焉龍朔三年移於磧北回紇本部仍改名

瀚海都護總章二年又改名安北都護尋移於甘州東北一千

一十八里隋故大同城鎮垂拱元年置大同城鎮其都護權移

理刪丹縣西南九十九里西安城景龍二年又移理西受降城

開元十年又移理中受降城天寶八年張齊邱又於可敦城置

橫塞軍又自中受降城移理橫塞軍十二年安思順奏廢橫塞軍請於大同川西築城置軍玄宗賜名曰大安軍十四年築城功畢移大安軍理焉乾元後改爲天德軍緣居人稀少遂西南移三里權居永清柵其理所又移在西受降城自後頗爲河水所侵至元和八年春黃河泛溢城南面毀壞轉多防禦使周懷義上表請修築約當錢二十一萬貫中書侍郎平章事李吉甫密陳便宜以西城費用至廣又難施功請修天德舊城以安軍鎮其大略曰伏以西城是開元十年張說所築今河水來侵已毀其半臣量其事勢不堪重修若別築新城所費殊廣計其人功糧食及改屋宇比及事畢不下三十萬貫錢此但計費猶未知出入之處城南面卽爲水所壞其子城猶堅牢量留一千人足得住居天德軍士合抽居舊城豈可更勞版築虛棄錢物若三城是國家盛制仁愿舊規亦須得天德添兵然後有人修築按天德舊城在西城正東微南一百八十里其處見有兩城今之永清柵卽隋氏大同舊城理去本城約三里已下城甚牢小今隨事制宜仍存天德軍額北城周迴一十二里高四丈下闊一丈七尺天寶十二載安思順所置其城居大同川中當北戎大路南接牟那山鉗耳背山中出好材木若有營建不日可成牟那山南又是麥泊其地良沃遠近不殊天寶中安思順郭子儀等本築此城擬爲朔方根本其意以中城東城連振武爲左翼又以西城豐州連定遠爲右臂南制党項北制匈奴左右鉤帶居中處要誠長久之規也尋屬祿山有事子儀留老弱於此城身率大眾河北討賊爲賊將宋星星所破縱火焚燒遂移天德軍永清柵別置理所於西城只緣添兵未得且因循併在一

處力所不足實非遠圖臣久訪略已計料約修此城不過二萬貫錢今若於天德舊城隨事增飭因有移換仍取城隸於天德軍別置使名自為雄鎮以張聲勢可警殊鄰詔從之於是復移天德軍理所於舊城焉先是緣邊居人常苦室韋党項之所侵掠投竄山谷不知所從及新城施功之日遂有三萬餘家移止城內初議者又慮城大無人以實及是遠近奔湊邊軍益壯人心遂安

沃野故城在軍城北六十里卽是後魏時六鎮從西第一鎮也

州境

八到西取盩遠鎮故落鹽池經夏州至上都一千八百里

西南渡河至豐州一百六十里

西北至橫塞軍城二百里

西南至新宥州六百里

西至西受降城一百八十里

東南至中受降城二百里

東受降城本漢雲中郡地在榆林縣東北八里今屬振武節度

八到南至上都一千八百六十里

東南至東都取單于路一千八百二十里

東北至單于都護府一百二十里

東北至朔州四百里

西至中受降城三百里

武川城今名里城後魏六鎮從西第三鎮在軍北三百里自北

出石門障卽光祿城右入匈奴大路

光祿城東北有懷朔古城其城卽後魏六鎮從西第二鎮在今

中城界向北化柵側近也

中受降城本秦九原郡地漢武帝元朔二年更名五原開元十

年於此城置安北大都護府後又移徙事具天德軍

八到城東南至上都一千八百六十里

城東南至東都取單于路二千一百二十里

東至東受降城三百里

西北至天德軍二百里

元和郡縣志卷四
南至麟州四百里
北至磧口五百里

敬本故城在中城北四十里鄭虔軍錄曰時人以張仁愿河外築三城自古未有今敬本城周一萬八百七十二步壕塹深峻亦古之堅守賈耽古今述曰以地理求之前代九原郡城也

西受降城舊天德軍理於此城元和九年移理天德軍城在豐州西北八十里蓋漢朔

方郡地臨河縣故理處開元初為河水所壞至開元十年總管

張說於故城東別置新城今城一本云其後城西南隅又為河水所壞

本末具天德軍

八到

城南至上都一千八百八十里
東南至東都取單于路二千二百五十里
正東微南至天德軍一百八十里
東南渡河至豐州八十里
西南至定遠城七百里
北至磧口三百里磧口西至回鶻衙帳一千五百里

右三受降城景雲三年張仁愿所置也初突厥入寇朔方軍總

管沙吒忠義為賊所敗詔仁愿代之先是朔方軍北與突厥以

河為界河北岸有拂雲堆神祠突厥將入寇必先詣祠祭酹求

福因牧馬料兵而後渡河時突厥默啜盡眾西擊突騎施婆葛

仁愿奏請乘虛奪取漠南之地於河北築三受降城首尾相應

絕其南寇之路太子少師唐休璟以為兩漢以來皆北守黃河

今於寇境築城恐勞人費功終為賊所有仁愿固請不已中宗

竟從之仁愿表留年滿鎮兵以助其功皆咸陽兵二百餘人逃

歸仁愿擒獲盡斬之軍中股慄六旬而三城俱就以拂雲祠為

中城與東西兩城相去各四百餘里遙相應接北拓三百餘里

於牛頭牟那山北置烽堠一千八百所自是突厥不得度山放

牧朔方無復寇掠滅鎮兵數萬人初三城不置壅門及卻敵戰

具或問曰邊城禦賊之所不為守備何也仁愿曰寇若至此當

併力出戰迴顧望城猶須斬之何用守備生其退惡之心其後
常元楷爲總管始築壅門議者劣之

元和郡縣圖志卷第四終

元和郡縣圖志卷第五

唐 李吉甫 撰

河南道一

河南府

洛州東都

開元戶一十二萬七千四百四十

鄉二百

禹貢豫州之域在天地之中故三代皆爲都邑陽翟夏城禹都也偃師西亳湯都也周成王定鼎於郊鄔使召公先相宅乃卜澗水東瀍水西是爲東都今苑內故王城是也又卜瀍水東召公往營之是爲成周今河南府東故洛城是也至赧王獻地於秦昭襄昭襄王立爲三川郡三川伊洛河也漢改爲河南郡後漢光武帝建武元年入洛陽遂定都焉及董卓逼遷獻帝西都長安盡燒洛陽宮廟後又都馬魏文帝受禪亦都洛陽陳留王以司隸校尉所掌置司州領河南河東河內弘農平陽五郡晉武帝受

禪司州不改永嘉初劉曜叛亂司州沒胡後又沒於石勒東晉
穆帝永和五年桓溫入洛陽置河南郡宋武帝北平關洛復置
司州後魏孝文帝太和十九年六宮文武盡遷洛陽改爲河南
尹至周宣帝移相州六府於洛州以爲東京隋文帝改六府爲
六尚書省又置河南道行臺省仁壽四年煬帝詔楊素營東京
大業二年新都成遂徙居今洛陽宮是也其宮北據邙山南直
伊闕之口洛水貫都有河漢之象東去故城一十八里初煬帝
嘗登邙山觀伊闕顧曰此非龍門邪自古何因不建都於此僕
射蘇威對曰自古非不知以俟陛下帝大悅遂議都焉其宮室
臺殿皆宇文愷所創也愷巧思絕倫因此制造頗窮奢麗前代
都邑莫之比焉又改洛州爲豫州置牧三年罷州爲河南郡置
尹四年改東京爲東都十四年復置洛州隋亂王世充僭號稱
鄭改爲司州武德四年討平充復爲洛州仍置總管府其冬罷
府置陝東道大行臺太宗爲大行臺尚書令九年罷臺置洛州
都督府貞觀十八年廢府顯慶二年置東都則天改爲神都神
龍元年復爲東都開元元年改洛州爲河南府天寶元年改東
都爲東京至德元年復爲東都

府境

東西六百二十一里
南北

八到

西至上都八百五十里
東至鄭州二百八十里
東北至懷州一百五十里
西北至陝州三百五十里
東南至汝州一百七十里
東南取礮嶺路至陽翟縣二百四十里從縣至許州九十
里

貢賦

開元貢 白瓷器 綾
賦 絹 縣

管縣二十六

洛陽

河南

偃師

緱氏

鞏

伊闕

密 王屋 長水 伊陽 河陰 陽翟 潁陽

告成 登封 福昌 壽安 澠池 永寧 新安

陸渾 河陽 溫 濟源 河清 汜水 河陽等五縣今隸河陽

三城節度

洛陽縣 赤郭下 本秦舊縣歷代相因貞觀六年自金墉城移入郭

內毓德坊今理是也神龍初改為永昌尋復舊號

故洛陽城在縣東二十里按華延禕洛陽記云洛陽城東西七里南北九里洛陽城內宮殿臺觀府藏寺舍凡有一萬一千二百一十九門自劉曜入洛元帝渡江官署里閭鞠為茂草後魏

孝文帝太和十七年幸洛陽巡故宮遂詠黍離之詩為之流涕觀石經仍定遷都而經始洛京十九年九月新都始立於是六

宮文武盡遷洛陽

洛水在縣西南三里西自苑內上陽之南瀾漫東流宇文愷築

斜隄束令東北流當水衝捺堰九折形如偃月謂之月陂今雖

漸壞尚有存者

河南縣 赤郭下 本漢舊縣後魏靜帝改為宜遷縣周宣帝復為河

南隋仁壽四年遷都移縣於東都城內寬政坊即今縣是也永

昌元年以明堂初成改為合宮縣神龍初復舊二年復為合宮

景雲初復舊

洛水在縣北四里

伊水在縣東南十八里

瀍水在縣西北六十里禹貢曰伊洛瀍澗既入于河孔安國注

曰出河南北山水經云源出河南穀城縣北今驗水西從新安

縣東入縣界

天津橋在縣北四里隋煬帝大業元年初造此橋以架洛水用大纜維舟皆以鐵鎖鉤連之南北夾路對起四樓其樓爲日月表勝之象然洛水溢浮橋輒壞貞觀十四年更令石工累方石爲脚爾雅箕斗之間爲天漢之津故取名焉

中橋咸亨三年造累石爲脚如天津橋之制

通津渠在縣南三里隋大業元年分洛水西北名千步磧渠又東北流入洛水謂之洛口

偃師縣

畿西南至府七十里

本漢舊縣帝嚳及湯盤庚並都之商有三

亳成湯居西亳卽此是也至盤庚又自河北徙理於亳商家從此而改號曰殷武王伐紂於此築城息偃戎師因以名焉天寶七年四月河南尹韋濟奏於偃師縣東山下開驛路通孝義橋廢北坡義堂路焉

北邙山在縣北二里西自洛陽縣界東入鞏縣界舊說云北邙山是隴山之尾乃眾山總名連嶺脩互四百餘里

首陽山在縣西北二十五里

盟津在縣西北三十一里

緱氏縣

次赤西北至府六十三里

本古滑國也左傳曰秦師滅滑其後屬

晉至秦漢爲縣因山爲名隋大業十年移據公路澗西憑岸爲城卽今縣是也

緱氏山在縣東南二十九里王子晉得仙處

轅轅山在縣東南四十六里左傳欒盈過周王使候出諸轅轅注曰緱氏縣東南有轅轅關道路險隘凡十二曲將去復還故曰轅轅後漢河南尹何進所置八關此其一也

鄂嶺坂在縣東南三十七里晉八王故事曰范陽王保於鄂坂

後於其上置關

洛水西自洛陽縣界流入

曹城在縣東一里曹操與袁術相拒築城於此

袁術固一名袁公塢在縣西南十五里宋武北征記曰少室山西有袁術固可容十萬眾一夫守隘萬夫莫當

公路壘在縣南三里袁術與曹公相拒處

鉤鑠故壘在縣東北七里宋書司馬休之從宋公西征營於柏谷塢西卽此壘相連如鎖因以爲名也

鞏縣畿西至府一百四十里古鞏伯之國也春秋晉師克鞏戰國時韓獻

於秦至漢以爲縣屬河南郡隋大業十三年李密自潁川率羣盜十餘萬襲破洛口倉因據鞏縣仍築城斷洛川包南北山周迴三十餘里屯營其中後爲王世充所破縣本與成臯中分洛水西則鞏東則成臯後魏併焉按爾雅鞏固也四面有山河之固因以爲名

天陵山在縣東南六十里

黃河西自偃師縣界流入河於此有五社渡爲五社津後漢朱鮪遣賈強從五社津渡是也

洛水東經洛汭北對琅邪渚入河謂之洛口亦名什谷張儀說秦王下兵三川塞什谷之口卽此也

伊闕縣畿北至府七十里古戎蠻子國漢爲新城縣屬河南郡周武帝時屬伊川郡隋開皇十八年罷郡改爲伊闕縣

伊闕山在縣北四十五里兩山相對望之若闕伊水流其間故名

陸渾山俗名方山在縣西五十五里

伊水西自陸渾縣界流入左傳秦晉遷陸渾之戎於伊川是也
伊闕故關在縣北四十五里何進八關之一

密縣畿西南至府一百一十里本漢舊縣古密國也春秋諸侯伐鄭圍新

密漢屬河南郡隋大業二年廢十二年又置武德三年於此置
密州四年廢州以縣屬鄭州龍朔二年割屬河南府爾雅曰山
如堂者曰密因以為名

大隗山在縣東南五十里本具茨山黃帝見大隗於具茨之山
故亦謂之大隗山澗水源出於此

馬嶺山在縣南十五里洧水所出

王屋縣畿東南至府一百里本周時召康公之采邑漢為垣縣地後魏

獻文帝分垣縣置長平縣周明帝改為王屋縣因山為名仍於
縣置王屋郡天和元年又為西懷州隋開皇三年改為邵州大
業三年廢邵州以縣屬懷州顯慶二年割屬河南府

齊子嶺在縣東十二里即宇文周與高齊分據境之處也

黃河在縣南五十里

王屋山在縣北十五里周迴一百三十里高三十里禹貢底柱
析城至于王屋是也

析城山在縣西北六十里峯四面其形如城有南門焉故曰析
城

長水縣畿東至府二百三十里本漢盧氏縣地後漢晉宋不改後魏宣武

帝分盧氏東境置南陝縣屬弘農郡西魏廢帝改為長淵隋義
寧元年以犯高祖廟諱改為長水貞觀八年自虢州割屬穀州
顯慶二年屬河南府穀州今新安縣所理是也

伊陽縣畿北至府二百六十里本陸渾縣南界之地先天元年割置伊陽

縣

伊水路在縣西南出鸞掌山東流水經云出南陽魯陽縣蔓渠
山東北過陸渾縣南又東北過伊闕中又東北入於洛多雨暴
漲諸峽束水之處其高或七八丈故伊闕石壁有石銘云黃初
四年六月二十四日辛巳大水出高四丈五尺

銀鉞窟在縣南五里今每歲稅銀一千兩

河陰縣

畿西南至府二百三十里

本漢滎陽縣地開元二十二年以地當

汴河口分汜水滎澤武陟三縣地於輸場東置以便運漕卽侍
中裴耀卿所立初耀卿爲宣州刺史開元十八年因朝集上便
宜曰竊見江淮諸州所送租庸等本州正月二月上道至揚州
入斗門卽逢水淺停留一月已上四月已後始渡淮入汴多屬
乾淺又般運停留至六月七月方至河口卽遇黃河漲溢不得

入河又須停一兩月待河水較小始得上河入洛卽又漕洛乾
淺船艘不通計從江南至東都停滯日多得行日少艱辛欠折
因此而生伏見國家舊法河口元置武牢倉江南船不入黃河
卽於倉內便貯也鞏縣置洛口倉從黃河不入漕洛卽於倉內
安置爰及河陽倉柏崖倉太原倉永豐倉渭南倉節級取便例
皆如此水通利則隨近運轉不通利則且納在倉不滯遠船不
生隱盜每年剩得一二百萬石卽數年之外倉廩轉加至二十
二年以耀卿爲相兼轉運都使於是遂分置河陰縣及河陰倉
又河清縣置柏崖倉三門東置集津倉三門西置鹽倉三門北
鑿山十八里陸行以避湍險自江淮來者悉納河陰倉自河陰
候水調浮漕送含嘉倉又取曉習河水者遞送太原倉所謂北
運也自太原倉浮渭以實關中凡三年運七百萬石省腳三十

萬貫及耀卿罷相後緣北路險澀頗為隱欺議者言其不便事
又停

汴渠在縣南二百五十步亦名葭蕩渠禹塞滎澤開渠以通淮
泗後漢初汴河決壞明帝永平中命王景脩渠築堤十里立一
水門令更相注洄無復潰漏之患自宋武北征之後復皆堙塞
隋煬帝大業元年更令開導名通濟渠自洛陽西苑引穀洛水
達於河自板渚引河入汴口又從大梁之東引汴水入於泗達
於淮自江都宮入於海亦謂之御河河畔築御道樹之以柳煬
帝巡幸乘龍舟而往江都自揚益湘南至交廣閩中等州公家
運漕私行商旅舳艫相繼隋氏作之雖勞後代實受其利焉

汴口堰在縣西二十里又名梁公堰隋文帝開皇七年使梁睿
增築漢古堰遏河入汴也

三皇山亦曰敖高山上有三城卽劉項相持處春秋左氏傳曰
晉師在敖部之間亦此也

陽翟縣畿西北至府本夏禹所都春秋時鄭之櫟邑韓自宜

陽移都於此秦爲潁川郡楚漢之際韓公子成爲韓王項羽殺
成立鄭昌漢元年又誅昌立橫野君信六年徙信太原郡復置

潁川郡領縣二十理陽翟潁川屬縣後魏復置陽翟郡隋開皇十六

年廢郡置嵩州以縣屬焉大業三年隸襄城郡武德中又隸嵩
州貞觀元年廢入許州建都後改屬河南府

鈞臺在縣南十五里左氏傳曰夏啟有鈞臺之饗是也

潁陽縣畿西至古綸氏縣本夏之綸國也少康之邑在焉漢

屬潁川晉省後魏太和中於綸氏縣城置潁陽縣屬河南尹又
分潁陽置堙陽縣隋開皇六年改堙陽爲武林十八年又改爲

綸氏大業元年改爲嵩陽載初元年又改爲武林開元十五年復爲潁陽

大石山一名萬安山在縣西北四十五里

倚箔山望之如立箔山西北崖下有鍾乳隋時充貢

陽乾山在縣東二十五里潁水一源出陽乾山

太谷口在縣西北三十五里孫堅停兵太谷距洛陽九十里卽此谷

太谷故關在縣西北四十五里何進八關之一也

告成縣畿西北至府一百七十里本漢陽城縣屬潁川郡因陽城山爲名

後魏置陽城郡屬司州隋開皇三年廢郡以縣屬洛州十六年

於此置嵩州仁壽四年省嵩州以縣屬河南郡萬歲登封元年

則天因封中岳改名告成

許由山在縣南十三里

嵩高山在縣西北三十三里

少室山在縣西北五十里

陽城山在縣東北三十八里

鬼谷在縣北五里卽六國時鬼谷先生所居也

測景臺在縣城內西北隅高一丈開元十年詔太史監南宮說

立石表焉

登封縣畿西北至府一百三十五里本漢密高縣武帝元封元年置以奉太

室後省入陽城累代因之高宗將有事於中岳分陽城緱氏置

嵩城縣萬歲登封元年則天因封岳改爲登封

嵩高山在縣北八里亦名外方山又云東曰太室西曰少室嵩

高總名卽中岳也山高二十里周迴一百三十里

少室山在縣西十里高十六里周迴三十里潁水源出焉潁水有三

源右水出陽乾山之潁谷中水導源少室通阜左水出少室南溪東合潁水

啟母祠在縣東北七里漢書武帝祀中嶽見夏啟母石是也應劭云啟生而母化為石淮南子亦同嵩山記陽翟婦人今龕中

鑿石像其石漢安帝延光三年立

福昌縣畿東至府一百五十里古宜陽地春秋時屬晉七國時屬韓漢以

為縣屬弘農郡後漢建武三年馮異破赤眉於峭底餘眾走向宜陽帝自征之赤眉君臣面縛即此地也隋義寧二年於此置

宜陽郡武德元年改為熊州改宜陽縣為福昌縣取縣西隋宮為名貞觀元年州廢以縣隸穀州顯慶二年廢穀州以縣屬河南府今縣城即魏一合塢城東南北三面天險峭絕後周置重

兵於此以備高齊

女几山在縣西南三十四里

壽安縣畿東北至府七十六里本漢宜陽縣地後魏分新安置甘棠縣隋

開皇三年以縣屬熊州十六年改為穀州仁壽四年改名壽安縣貞觀七年改屬河南府

石墨山在縣西南三里山石如墨可以書字

洛水西自福昌縣界流入

少水今名慈澗水出縣北

八關故城在縣東北三十里後漢靈帝中平元年以河南尹何進為大將軍將五營士屯都亭置函谷廣城伊闕太谷轅轅旋門小平津孟津等八關都尉官理於此

永濟橋在縣西十七里煬帝大業三年置架洛水隋亂毀廢貞觀八年脩造舟為梁長四十丈三尺廣二丈六尺

澠池縣

畿

東至府一百五十里

本韓地哀侯東徙其地入秦漢以為縣屬

引農郡隋文帝時屬熊州

今河南府福昌縣是也

十六年改屬穀州顯慶

二年廢穀州縣屬河南府

廣陽山亦名澠池山在縣東北五十五里

穀水南去縣二百步東經秦趙二城俗謂之俱利城東城在縣

西十三里西城在縣西十四里昔秦趙會於澠池之處

大塢故城在縣北十五里後魏武帝入關使行臺楊騰出關安

撫騰因舊城置大塢鎮

永寧縣

畿

東至府二百里

漢澠池縣之西境後漢晉宋不改後魏文帝

於今縣東四十里置北宜陽縣屬宜陽郡廢帝二年改為熊耳

縣隋義寧二年置永寧縣屬宜陽郡貞觀元年改屬河南府

二嶠山又名嶽崙山在縣北二十八里春秋時秦將襲鄭蹇叔

哭送其子曰晉人禦師必於嶠嶠有二陵其南陵夏后臯之墓

北陵文王之所避風雨必死是閒漢建安中曹公西討巴漢惡

其險更開北山道路多從之便路側有石銘曰晉太康三年弘

農太守梁柳修復舊道西征記嶠上不得鳴鼓角鳴則風雨總

至自東嶠至西嶠三十五里東嶠長坂數里峻阜絕澗車不得

方軌西嶠全是石坂十二里險絕不異東嶠漢馮異破赤眉於

嶠底魏龐德破張白騎於兩嶠間

熊耳山在縣東北四十五里後漢世祖破赤眉積甲宜陽縣城

西與此山齊按禹貢導洛自熊耳在商州上洛縣界與此別也

穀陽山在縣西北五十五里漢書地理志穀水出穀陽山

回谿俗名迴坑在縣東北三十六里馮異與赤眉戰敗於此璽

書勞曰始垂翅於迴谿終奮翼於澠池可謂失之東隅收之桑

榆

新安縣畿東至本漢舊縣屬弘農郡晉改屬河南郡後魏屬

新安郡周武帝保定三年省新安郡又於今縣理置中州建德

六年省中州又置新安郡隋開皇十六年改置穀州貞觀元年

省穀州新安屬河南府

穀水在縣南二里國語曰穀洛鬪壞王宮是也

縣城本名通洛城周武帝將東封令陝州總管尉遲綱築此城

以臨齊境

白超故城一名白超壘一名白超塢在縣西北十五里壘當大

道左右有山道從中出漢末黃巾賊起白超築此壘以自固東

魏脩築為城因名白超城

函谷故關在縣東一里漢武帝元鼎三年為楊僕徙關於新安

按秦函谷關在今陝州靈寶縣西南十二里以其道險隘其形

如函故曰函谷項羽坑秦降卒於新安即此地今縣城之東有

南北塞垣楊僕所築

慈澗故鎮在縣東南二十里周武帝保定六年置武德三年討

王世充前軍鎮此太宗以輕騎擊破之充拔鎮歸於東都

陸渾縣畿東北至府本陸渾戎所居春秋時秦晉遷陸渾之

戎於伊川至漢為陸渾縣屬弘農郡後屬河南尹後魏改為伏

流縣隋大業元年省伏流縣移陸渾縣於今理

三塗山在縣西南五十里左傳曰四嶽三塗陽城大室九州之

險

明臯山在縣東北十五里

伊水在縣西南自虢州盧氏縣界流入

伏流城卽今縣理城東魏孝靜帝武定二年所築以城北焦澗水伏流地下西有伏流坂因以爲名

河陽縣

畿西南至州八十里

自河陽以下至河清等五縣今權隸三城節度

本周司寇蘇忿生之邑後爲晉邑在漢爲河陽縣屬河內高齊省入溫軹二縣隋開皇十六年分溫軹二縣重置屬懷州武德四年平王世充後割屬河南府

南城在縣西四面臨河卽孟津之地亦謂之富平津後魏使高永樂守河南以備西魏卽此也周隋爲宮貞觀置鎮

中渾城東魏孝靜帝元象元年築之仍置河陽關天寶已前亦於其上置關縣西南十三里古遮馬堤卽後魏爾朱榮殺朝士千三百餘人於此謹按至德中史思明之來寇也時李光弼已至東都聞思明將至乃移牒留守及河南尹并留司官坊市居人令悉出避寇空其城乃率麾下士馬數萬東守河陽三城拒逆賊賊黨初謂光弼自洛而西及聞保河陽出其意外疑懼久之不敢犯宮闕光弼訓練招集威聲大振賊雖入城憚光弼兵威南不出百里西不越畿內陝州得脩戎備關隘無虞皆光弼保河陽之力故自乾元已後常置重兵貞元後加置節度爲都城之巨防造浮橋架黃河爲之以船爲腳竹篙互之晉陽秋云杜元凱造河橋於富平津卽此是也船篙出洪州

溫縣

畿西南至府一百三十里

本周畿內司寇蘇公之邑春秋周襄王賜晉文公漢以爲縣屬河內郡隋大業十三年自故溫縣移於今所皇朝建都割屬河南府

濟源縣

畿南至府一百二十里

古軹邑屬魏秦昭王時伐魏取軹漢文帝

時封薄昭為軹侯屬河內郡隋開皇十六年分軹縣置濟源縣屬懷州以濟水所出因名顯慶二年割屬河南府

濟水在縣西北三里平地而出有二源其東源周迴七百步深不測西源周迴六百八十五步深一丈皆繚之以周墻源出王屋山山海經云王屋之山澗水出焉郭璞注云澗沅水之源尚書禹貢云導沅水東流為濟入于河溢為滎孔安國注云濟水入河並流十數里而南截河又並流數里溢為滎澤漢書道沅水東流為沔入于河軹為滎東出于陶丘北又東至于荷又東北會于汶又北東入于海顏師古云沅水流而為濟截河又為滎澤陶丘在濟陰定陶西南荷即荷澤過荷澤又與汶水會北折而東入于海也按沅水出今王屋縣王屋山東流至濟源縣而名濟水滎澤在今鄭州滎澤縣定陶今曹州濟陰縣也荷澤在今兗州魚臺縣汶水出今兗州萊蕪縣然濟水因王莽末旱渠涸不復截河南過今東平濟南淄川北海界中有水流入於海謂之清河實荷澤汶水合流亦曰濟河蓋因舊名非本濟水也而水經是和帝已後所撰乃言濟水南過滎澤至於乘氏等縣一依禹貢舊道斯不詳之甚也酈道元又從而注之尤為紕繆矣

百尺溝在縣東北六里引濟水溉灌仁壽三年置初分功人穿十丈故名百尺溝

河清縣畿南至府六十里本漢軹縣地縣西有柏崖故城即東魏將侯景所築武德初於城東置大基縣八年省咸亨四年重置先天元年以犯元宗廟諱改名河清

汜水縣畿西南至府一百八十里古東虢國鄭之制邑漢之成臯縣一名

虎牢穆天子傳曰天子獵于鄭圃有獸在葭中七萃之士擒之以獻天子命蓄之東虞因曰虎牢楚漢之際項羽使海春侯曹咎守此漢王破之咎自殺至宋武帝北平關洛置司州刺史理虎牢魏使奚斤攻宋司州刺史毛德祖經二十日不克城中傷者無血知其乏水潛作地道其穴猶存隋開皇十八年改成阜爲汜水縣大業十三年陷於王世充武德四年討平充復於縣理置鄭州貞觀七年移鄭州於管城以縣屬焉顯慶二年改屬河南府垂拱四年改名廣武縣神龍元年復爲汜水開元二十九年自虎牢城移於今理

黃河自鞏縣界流入

汜水出縣東南三十二里浮戲山經武牢城東漢破曹咎於此成阜故關在縣東南二里

旋門關在縣西南十里卽八關之一

汜口去縣五十里今屬河陰

板渚在縣東北三十五里初竇建德眾數十萬自於板渚結陣南屬鵲山以臨汜水太宗帥輕騎擊之賊眾大潰建德竄於牛口渚將軍白士讓生獲之先是童謠云豆入牛口勢不得久果敗於此牛口渚與板渚迤邐相接

等慈寺在縣東七里王師旣破建德詔於戰所起寺立碑紀功焉令顏師古爲碑文

元和郡縣圖志卷第五終

元和郡縣圖志卷第六

唐 李吉甫 撰

河南道二

陝虢觀察使

陝州

虢州

汝州

陝州

陝郡

大都督府

開元戶四萬七千三百二十二

鄉五十六

今為陝虢觀察使理所

管州三

陝州

虢州

汝州

縣二十一

都管戶一萬一千九百四十七

墾田

禹貢豫州之域周為二伯分陝之地公羊傳曰自陝以東周公主之自陝以西召公主之又為古之虢國今平陸縣地是也戰國時為魏地後屬韓秦并天下屬三川郡漢為弘農郡之陝縣

自漢至宋不改後魏孝文帝太和十一年置陝州以顯祖獻文
皇帝諱弘改為恒農郡十八年罷陝州孝武帝永熙中重置西
魏文帝大統三年又罷州周明帝復置屯兵於此以備齊隋大
業三年復罷以其地屬河南郡義寧元年改置弘農郡武德元
年改為陝州廣德元年改為大都督府謹按陝城蒲牢與彭城
滑臺壽陽懸瓠屢經攻守皆中夏之要云

州境東西二百五十二里
南北隔河二百四十六里

八到西至上都五百一十里
東至東都三百五十里
西南至虢州一百三十里
北至絳州一百里

西至潼關二百里
西北至河中府二百四十五里

貢賦開元貢 柏子仁 瓜 蓂 布 絁

管縣八 陝 硤石 靈寶 夏 安邑 平陸

芮城 垣

陝縣望郭下本漢縣也歷代不改後魏改為陝中縣西魏去中字

周明帝於陝城內置嶠郡以陝嶠二縣屬焉隋開皇初罷郡以

縣屬陝州

陝原在縣西南二十五里

號山在縣西二里臨黃河

黃河自靈寶界流入後漢獻帝東歸至陝議者欲令天子浮河
東下太尉楊彪曰從此以東有三十六灘非萬乘所當從也乃
止

曹陽墟俗名七里澗在縣西南七里獻帝東遷李傕郭汜追戰
於弘農東澗天子遂露次於曹陽之墟謂此地也

州理城即古號國城西征記曰陝縣周召分職處南倚山原北

臨黃河懸水百餘仞臨之者皆為悚慄

故焦城在縣東北百步

太原倉在縣西南四里隋開皇二年置以其北臨焦水西俯大河地勢高平故謂之太原今倉實中周迴六里

太陽故關在縣西北四里後周大象元年置即茅津也春秋時秦伯伐晉自茅津濟封峭尸而還

徽伯故壘在縣南二里高歡使李徽伯戍陝周太祖攻之徽伯築壘於此拒太祖

北利人渠隋開皇六年文帝遣邳國公蘇威引橐水西北入城百姓賴其利故以為名

南利人渠東南自硤石界流入與北渠同時疏導

太陽橋長七十六丈廣二丈架黃河為之在縣東北三里貞觀十一年太宗東巡遣武侯將軍丘行恭營造

硤石縣望西至州五十里本漢陝縣地屬弘農郡自漢至宋不改後魏

孝文帝分陝縣東界置峭縣明帝二年分陝峭二縣置峭郡隋文帝罷郡以峭縣屬陝州大業二年廢入陝縣義寧元年重置理硤石塢貞觀中改名硤石縣

底柱山俗名三門山在縣東北五十里黃河中禹貢曰導河積石至於龍門東至於底柱河水分流包山山見水中若柱然也又以禹理洪水山陵當水者破之以通河三穿既決河出其間有似於門故亦謂之三門漢成帝鴻嘉四年楊焉上言底柱之險可鑄廣之上乃令鑄之纔沒水中不能復去而令湍流沸怒為害彌甚隋開皇三年遣倉部侍郎韋瓚自蒲陝以東募人能於洛陽運米四十石經底柱之險達於常平者免其征戍貞觀

十二年太宗東巡臨幸於此令魏徵勒銘

莘野在縣西十五里春秋時有神降於此

黃河西自陝縣界流入東經砥柱水經注曰後魏景明中帝遣諫議大夫寇慈帥工五千人歲時脩理以平河阻

魏長城在縣北二十二里魏惠王十九年所築東南起嶠山西北至河三十七里

靈寶縣望東北至州七十五里本漢弘農縣自漢至後魏不改隋開皇十

六年於今縣置桃林縣屬陝州天寶元年於縣南古函谷關尹真人宅掘得天寶靈符遂改縣為靈寶

稠桑澤在縣西十里虢公敗戎於桑田即是也

函谷故城在縣南十里秦函谷關城漢弘農縣也西征記曰函谷關城路在谷中深險如函故以為名其中劣通東西十五里

絕岸壁立崖上柏林蔭谷中殆不見日關去長安四百里日入則閉雞鳴則開秦法也東自嶠山西至潼津通名函谷號曰天險所謂秦得百二也魏囂將王元說囂曰請以一丸泥東封函

谷關即此也

桃林塞自縣以西至潼關皆是也春秋時晉侯使詹嘉處瑕守桃林之塞三秦記曰桃林塞在長安東四百里若有軍馬經過

好行則牧華山休息林下惡行則決河漫延人馬不得過矣

涇津在縣西北三里隋義寧元年置關貞觀元年廢關置津曹陽亭在縣東南十四里陳涉使周文西入秦秦使章邯擊破

之殺文於曹陽即此地也後曹公改為好陽

夏縣望西南至州一百二十里本漢安邑縣地屬河東郡後魏孝文帝太和十一年別置安邑縣十八年改為夏縣因夏禹所都為名隋

大業二年屬河東郡武德元年又屬虞州今陝州安邑縣是也貞觀十七

年隸絳州大足元年割屬陝州尋屬絳州乾元三年屬陝州

涑川在縣北四十里左傳晉侯使呂相絕秦曰伐我涑川按川

東西三十里南北七里

安邑故城在縣西北十五里夏禹所都也

安邑縣望南至州一百一十里本夏舊都漢以為縣屬河東郡隋開皇十

六年屬虞州貞觀十七年屬蒲州乾元三年割屬陝州

雷首山一名中條山在縣南二十里其山有銀谷在縣西南三

十五里隋及武德初並置銀台監今廢

高埃原在縣北三十里原南坂口即古鳴條陌也湯與桀戰於

此

鹽池在縣南五里即左傳郇瑕氏之地沃饒近鹽是也今按池

東西四十里南北七里西入解縣界

平陸縣望西南至州一百七十里本漢大陽縣地屬河東郡後魏於此置

河北郡領河北縣隋開皇十五年河北縣改屬蒲州貞觀元年

又屬陝州天寶元年改為平陸縣

黃河在縣南二百步

吳山即吳坂也伯樂遇騏驎駕鹽車之地其坂自上及下七山

相重

傅巖在縣缺七里即傳說版築之處

閒原在縣西六十五里即虞芮爭田讓為閒田之所

顛軫坂今謂之軫橋在縣東北四十五里左傳曰冀為不道入

自顛軫是也

瑟瑟窟在縣西北四十里

故虞城在縣東北五十里虞山之上晉侯使荀息假道於虞以伐虢卽此城也

下陽故城在縣東北二十里

芮城縣望東至本漢河北縣地屬河東郡自漢至後魏因之

周明帝二年改名芮城屬河北郡其年又於此置虞州武帝建

德二年於縣置芮州貞觀元年廢芮州以縣屬陝州

黃河在縣南二十里

故魏城春秋晉滅之賜畢萬是也在縣北五里

故芮城在縣西二十里古芮伯國也

垣縣上北至本漢縣屬河東郡後魏獻文帝皇興四年置邵

州及白水縣周明帝武成元年改白水為亳城縣隋大業三年改亳城為垣縣屬絳郡武德元年屬邵州九年屬絳州貞元三

年割屬陝州縣枕黃河

垣城在縣西二十里

臯落城在縣西北六十里左傳曰晉侯使太子申生伐東山臯

落氏是也

虢州弘農開元戶一萬七千七百四十二鄉五十

禹貢雍及豫二州之境周初為虢國虢有三北虢今陝州平陸

縣東虢今滎陽縣西虢在今鳳翔扶風縣也魯僖公二年晉荀

息假道於虞以伐虢虢亡乃為晉地其後三卿分晉屬韓秦兼

天下屬三川郡至漢武帝元鼎四年置弘農郡後魏以獻文帝

諱弘改為恒農郡孝武帝永熙三年分為西恒農屬陝州周明

帝復為弘農隋開皇三年廢郡以縣屬陝州大業二年又改屬

豫州三年又於弘農縣置弘農郡義寧元年改為鳳林郡其年

於盧氏縣置號郡武德元年改為號州其年改鳳林郡為鼎州
因鼎湖以為名貞觀八年廢遂移號州於今理所

州境

八到

東至上都四百三十里
西北至潼關一百三十里
西南至商州一百七十里
東至陝州一百三十里
西北至河中府一百八十里

貢賦

開元貢天門冬地骨白皮麝香
緇絕縣

管縣六 弘農 盧氏 閩鄉 玉城 朱陽 湖城

弘農縣

郭下本漢舊縣隋大業二年省三年復於今湖城縣西

南一里置尋移就郡理其年移郡於鴻臚川縣亦隨徙即今縣

是也義寧元年屬鳳林郡武德元年屬鼎州貞觀八年屬號州

方伯堆在縣東南五里宋奮武將軍魯方平所築

鴻臚水過縣北十五里入靈寶界溉田四百餘頃

盧氏縣

上西北至州一百六十六里本漢舊縣春秋時西號之邑地有盧氏

山或言盧敖得道於此山宜五穀可以避水災隋開皇三年改

為號州大業三年廢以盧氏屬河南郡武德元年又置號州縣

依舊

熊耳山在縣南五十里禹貢導洛於此

閩鄉縣

望東南至州一百里本漢湖縣地屬京兆尹自漢至宋不改周

明帝二年置閩鄉郡按閩鄉本湖縣鄉名閩古文間字也說文

從門旻聲隋開皇三年廢閩鄉郡十六年移湖城縣於今所改

名閩鄉縣屬陝州貞觀八年改屬號州

秦山一名秦嶺在縣南五十里南入商州西南入華州山高二

千丈周迴三百餘里

黃巷坂在縣西北三十五里卽潼關路也水經注曰河水自潼關東北流側有長坂謂之黃巷坂歷北出東嶠通謂之函谷關岸高道狹車不得方軌魏武征韓遂馬超連兵此地又潘岳西征賦曰遡黃巷以濟潼亦謂此也

桃源在縣東北十里古之桃林周武王放牛之地也

黃河在縣北三里

全鳩水一名全節水漢戾太子亡匿之處

思子宮故城在縣東北二十五里漢武帝爲戾太子所築也

曹公故壘在縣西二十五里魏武征韓遂馬超此地置壘又宋武之入長安檀道濟王鎮惡濱河帶險大小七營皆此處

赫連氏京觀俗號平吳臺在縣西二十二里赫連勃勃使太原公昌攻劉裕將朱齡石於潼關克之築臺以表武功

玉城縣上西北至本漢盧氏縣地屬弘農郡後魏正始二年

分立石城縣廢帝改爲玉城縣周武帝天和元年廢隋義寧元年重置貞觀八年移於今理

朱陽縣上東北至本漢盧氏縣屬弘農郡後魏太和十四年

蠻人樊磨背梁歸魏立朱陽郡並朱陽縣令樊磨爲太守大統

三年分爲朱陽郡屬東義州周武帝保定二年又省郡宣帝大

象元年割盧氏西界以益朱陽縣隋開皇四年北屬陝州大業

三年改屬虢州

湖城縣望東南至本漢湖縣屬京兆尹卽黃帝鑄鼎之處後

漢改屬弘農郡至宋加城字爲湖城縣

荆山在縣南卽黃帝鑄鼎之處

夸父山在縣東南三十五里

湖縣故城在縣西南二里

汝州

臨汝 開元戶二萬六千五百二十九 元和戶一萬三千七百九十九

鄉六十七 鄉三十七

禹貢豫州之域春秋時周王畿及鄭楚之地後屬於晉六國時復為韓魏之地秦屬三川郡在漢為河南郡之梁縣地也隋開皇四年自陸渾縣界移伊州理於此大業二年改為汝州三年改為襄城郡隋亂陷賊武德四年討平王世充復為伊州貞觀八年改為汝州

州境

東西二百三里 南北二百五十二里

八到

西至上都九百八十里 西北至東都一百七十里 南至蔡州四百五十里 西南至鄧州四百七十五里 東至許州二百三十里

貢賦

開元貢 細絁 絁

管縣七

梁

臨汝

魯山

葉

襄城

郟城

龍興

梁縣

望郭下 漢舊縣古蠻子邑戰國時謂之南梁以別大梁少梁 卽左傳云楚為一昔之期而襲梁及霍也隋煬帝改梁縣為承

休縣屬汝州貞觀元年又改為梁縣

蠻中聚卽戎蠻子國也在今郡西南俗謂之麻城又有陽人聚 故城在今縣西秦滅東周徙其君於陽人聚卽此城也漢末孫 堅大破董卓軍於此高齊於此置汝北郡以備周寇故城在今 縣南亦名王塢城

汝水經縣南三里

廣成澤在縣西四十里後漢安帝永初元年以廣成游獵地假與貧人元初二年鄧太后臨朝鄧騭兄弟輔政以為文德可興

武功宜廢請寢蒐狩之禮於時馬融以文武之道並用作廣成贊以諷案此澤周迴一百里隋煬帝大業元年置馬牧於此周承休城在縣東北二十六里漢封周後於此

黃坡在縣東二十五里南北七里東西十里隋朝修築有溉灌之利隋末廢壤乾封初有詔增修百姓賴其利焉

臨汝縣上東南至州六十里本漢梁縣地先天二年置貞元七年刺史陸長源奏請割梁縣西界二鄉以益之乃自下縣昇為上縣

魯山縣上北至州一百五十里本漢魯陽縣古魯縣也屬南陽郡魯陽公與韓戰酣揮戈日為退三舍謂此地也後魏太和十一年孝文帝南巡置魯陽鎮十八年改鎮為荊州二十二年罷荊州置魯陽郡改魯陽縣為北山縣周改為魯山縣武德四年又於縣置

魯州貞觀元年州廢以魯山屬伊州八年改伊州為汝州縣仍屬焉

魯山在縣東北十里
魚齒山在縣東六十里春秋楚師伐鄭涉於魚齒之下山有澧水故言涉也

汝水出縣西一百五十里
天息山一名伏牛山

澧水出縣西大陌山後漢世祖破王尋於昆陽士卒赴水死者甚眾澧水為之不流即此水也

溫湯水在縣西四十里狀如沸湯可以熟米側有石銘曰皇女湯可已萬病

魯陽關水俗謂之三鷓水經縣西七里其關三鷓鎮在縣西南十九里後周置以禦高齊亦名平高城

河南道一

魯城在縣東北十七里高齊置以禦周

葉縣緊西北至州二百一十里本楚之葉縣春秋楚人遷許於此其後楚

使沈諸梁尹之僭號稱公謂之葉公秦置郡縣隸於南陽後漢

書謂之小長安言地沃人豐也開元三年於縣置仙州以漢時

王喬於此得仙也二十六年廢仙州屬許州其年又割屬汝州

方城山在縣西南十八里楚屈完曰楚國方城以為城是也

黃城山一名苦菜山在縣西二十五里即長沮桀溺耦耕處

汝水西北流入去縣二十五里

昆陽故城在縣北二十五里後漢世祖破王邑王尋之處

燒車水在縣南二十四里世祖破王尋燒其輜重於此水濱因

以為名

襄城縣望西北至州一百四十里本秦舊縣漢因之屬潁川郡春秋襄王

避叔帶之難出居鄭地汜在今縣南一里古汜城是蓋以周襄

王嘗出居此故名襄城晉及後魏屬襄城郡隋開皇三年改郡

為汝州以縣屬焉大業三年廢汝州以縣屬許州開元四年置

仙州割襄城縣屬焉二十六年廢仙州復隸許州天寶七年又

屬汝州

汝水經縣南去縣一里縣理廢汝州城即古襄城楚靈所築後

漢馮異據之降世祖莊子曰黃帝游於襄城之野七聖皆迷遇

牧馬童子而問道焉亦此地也

郟城縣緊西北至州八十里本春秋時鄭地後屬楚又入於晉七國時

又屬韓至漢以為縣屬潁川郡晉屬襄城郡後魏屬南陽郡高

齊省隋煬帝大業二年移輔城縣於今縣西北五里屬汝州四

年改輔城縣為郟城縣

汝水西去縣七里

扈澗水出縣北三十里

城父故城在縣東南四十里故殷時應國也左傳楚大城城父使太子建居之

龍興縣上西北至州九十里本漢邾縣地後魏太和十八年置汝南縣

高齊天保七年廢隋開皇十八年復置汝南隋末廢則天證聖元年置武興縣神龍元年改爲龍興縣縣城本通鷓城卽後漢賈復城也復南擊鄆所築後魏太和二十三年孝文帝親征馬圈行至此城昏霧得三鷓引路遂過南山故號通鷓城

大龍山在縣東南三十五里劉累學擾龍遷於魯縣因以名山

汝水在縣北四十五里西南從梁縣界流入

湛水在縣東三十里春秋襄公十六年楚公子格帥師戰於湛坂是也

滎陽城一名應城在縣南二十五里後魏置滎陽縣隋開皇十年改爲湛水武德四年又置滎陽縣

元和郡縣圖志卷第六終

元和郡縣圖志卷第七

唐 李吉甫 撰

河南道三

汴宋節度使 汴州 宋州 亳州 潁州

汴州 陳留 開元戶八萬二千一百九十 鄉一百六十一

雄 元和戶八千二百一十八 鄉五十三

今為汴宋節度使理所 管州四 汴州 宋州 亳州 潁州

縣二十八 都管戶三萬一千四百四十四

禹貢豫州之域春秋鄭地戰國魏都史記魏惠王自安邑徙理大梁即今浚儀縣秦為三川郡地漢陳留郡之浚儀縣也酈生說漢高曰陳留天下之衝四通五達之郊漢文帝以皇子武為梁王都大梁以其地卑溼東徙睢陽今宋州是也漢陳留郡即

今陳留縣東魏孝靜帝於此置梁州周宣帝改為汴州以城臨汴水故
也 隋大業二年州廢以開封浚儀屬鄭州隋亂陷賊武德四年
平王世充復置汴州

州境東西一百九十六里
南北二百三十五里
八到西至上都一千二百八十里
西至東都四百二十里
南至宋州三百里
北至滑州二百一十里
東北至曹州二百四十五里
東南至陳州三百一十里

貢賦開元貢 絹二十四匹 賦 絲 絹

管縣六 開封 浚儀 陳留 雍丘 封丘 尉氏

開封縣望郭下 理東界本漢舊縣屬河南郡魏為秦所敗走保開封卽
此城也晉屬滎陽郡後魏天平元年於此置開封郡高齊天保
七年廢隋開皇六年復置開封縣屬汴州大業二年廢汴州以
縣屬鄭州武德四年重置汴州開封又屬焉貞觀元年廢延和
元年於城內別置開封縣管東界

蓬澤在縣東北十四里今號蓬池左氏所謂蓬澤也

長垣故城一名倉垣城在縣北二十里漢陳留太守所理

梁王吹臺在縣東南六里俗號繁臺

沙海在縣北二里戰國策齊欲發卒取周九鼎顏率說曰大梁
之君臣欲得九鼎謀於沙海之上為日久矣卽謂此也隋文疏
鑿舊跡引汴水注之以習舟師以伐陳陳平之後立碑其側以
紀功焉今無水

蓼隄在縣東北六里高六尺廣四丈梁孝王都大梁以其地卑
溼東徙睢陽乃築此隄至宋州凡三百里

浚儀縣望郭下 理西界本漢舊縣屬陳留郡故大梁也魏惠王自安邑

徙此因浚水為名後魏於此置梁州周宣帝改為汴州縣屬之
隋大業二年廢汴州改屬鄭州武德四年於此重置汴州以縣
屬焉

夷門史記大梁城有十二門東門隱士侯嬴年七十家貧為夷
門監者魏公子無忌厚遺之不肯受

枯遮梁溝秦始皇二十二年王賁引水灌大梁城於此溝

琵琶溝水西自中牟縣界流入通濟渠隋煬帝欲幸江都自大
梁城西南鑿渠引汴水即濩宕渠也

陳留縣

望西至州五十里

本漢陳留郡陳留縣地武帝置陳留郡屬兗

州按留本鄭邑後為陳所并故曰陳留又按彭城亦有留此留
屬陳故稱陳留晉為陳留國隋開皇三年分浚儀縣置陳留縣
屬汴州武德四年屬杞州今汴州雍丘縣是也貞觀元年廢杞
州屬汴州

故莘城在縣東北三十五里古莘國地也國語湯伐桀桀與韋
顧之君拒湯於莘之墟遂戰於鳴條之野

東昏故城本漢縣縣東北九十里即陽武之戶牖鄉陳平之故
里也

雍丘縣

望西至州一百一十里

本漢舊縣亦古之雍國及杞國周武王克

殷封禹後東樓公於杞後魏孝昌四年分東郡陳留置陽夏郡
理雍丘城隋開皇三年罷郡以縣屬汴州武德四年於此置杞
州貞觀元年廢以縣屬汴州

雍丘故城今縣城是也春秋時杞國城也杞為宋滅城北臨汴
河晉永嘉末鎮西將軍祖逖為豫州刺史理於此逖累破石勒
軍由是黃河已南皆為晉土人皆感悅逖卒百姓立祠

高陽故城在縣西南二十九里顓頊高陽氏佐少昊有功受封此邑高祖攻昌邑西過高陽又酈食其墓在此

外黃故城縣東六十里黃本屬宋後屬陳留郡以魏郡有內黃故此為外黃

封丘縣縣南至古之封國左傳魯封父之繁弱是也後屬衛

亦屬魏漢高祖與項羽戰敗於延鄉有翟母者免其難故以延

鄉為封丘縣以封翟母屬陳留郡後魏并入酸棗宣武帝又置

封丘縣屬陳留郡隋開皇三年罷郡以縣屬汴州

黃池在縣南七里魯哀公十三年晉侯與吳子爭盟於此

尉氏縣縣北至本漢舊縣春秋時鄭大夫尉氏之邑自漢歷

後魏屬陳留郡不改高齊省以地入開封隋開皇六年復置尉

氏縣屬汴州武德四年於此置洧州貞觀元年廢以縣屬汴州

三亭岡在縣西三十七里秦使謁者王稽使魏夜與范雎言曰

待我於三亭之南即此岡之南也

故鍾城在縣西三十五里魏太傅鍾繇故里

宋州睢陽開元戶十萬三千鄉一百九十三

禹貢豫州之域即高辛氏之子閼伯所居商丘今州理是也周

為青州之域武王封微子於宋自微子至君偃三十三世為齊

楚魏所滅三分其地魏得其梁陳留齊得濟陰東平楚得沛按

梁即今州地秦并天下改為碭郡後改為梁國漢文帝封其子

武為梁王自漢至晉為梁國屬豫州宋改為梁郡隋於睢陽置

宋州大業三年又改為梁郡隋亂陷賊武德四年討平王世充

又為宋州天寶末祿山亂兩河郡縣多所陷沒唯張巡許遠姚

閆三人堅守睢陽賊將尹子奇併力攻圍踰年不克城中孤危

糧竭人相食殆盡時賀蘭進明許叔冀屯軍臨淮爭權不協不發援師城竟為賊所陷巡遠等抗詞不屈遂俱被害然使賊鋒挫衄不至江淮巡遠之力也

州境東西三百五十九里南北二百一十八里

八到西至上都一千五百八十里西至東都九百二十里東南至泗州七百五十里東北至徐州三百五十里東南至亳州一百四十里西北至曹州一百五十里

貢賦開元貢賦 緡二十匹 緡二十匹

管縣十 宋城 碭山 虞城 楚丘 柘城 穀熟

下邑 單父 襄邑 寧陵

宋城縣望郭下 漢睢陽縣屬宋國後屬梁國後魏屬梁郡隋開皇三年罷梁郡以縣屬亳州十六年於此置宋州睢陽屬焉十八年改為宋城

睢水西南自寧陵縣界流入

渙水西南自寧陵縣界流入

隕石水源出縣北四十里春秋時隕石于宋其處為潭

小蒙故城縣北二十二里即莊周之故里

州城古闕伯之墟契孫相土亦都於此春秋為宋國都漢梁孝

王廣睢陽城七十里開汴河後汴水經州城南

兔園縣東南十里漢梁孝王園

清冷池在縣東二里

碭山縣上一百五十里西至州 漢碭縣屬梁國後漢不改晉以其地併入

下邑宋復置碭縣屬梁郡後魏置安陽屬碭郡高齊文宣帝並廢以安陽縣屬彭城郡隋開皇十八年改安陽縣為碭山縣大

業二年改屬宋州碭文石也以其山出文石故以名縣

虞城縣上 州七十里 西南至 本虞國舜後所封之邑後漢及晉屬梁國

後魏延昌中於此置蕭縣理虞城屬沛郡高齊省隋開皇十六年分下邑置虞城縣屬宋州

孟諸澤在縣西北十里周迴五十里俗號盟諸澤

故綸城縣東南三十五里左傳少康逃奔有虞虞妻以二姚而邑諸綸

平臺縣西四十里左傳宋皇國父為宋平公所築漢梁孝王大治宮室為複道自宮連屬於平臺三十餘里與鄒枚相如之徒並游其上即此也

楚丘縣緊 南至 古戎州己氏之地至漢為己氏縣屬梁國後漢屬濟陰郡北齊廢隋開皇五年又置屬曹州六年改為楚丘

縣武德五年屬戴州今宋州單父縣是也 貞觀十七年廢戴州隸宋州

楚丘故城在縣北三十里

柘城縣上 東北至州 本陳之株邑詩陳風株林刺靈公是也

至秦為柘城縣續漢志屬陳郡至晉太康中廢隋開皇十六年復置貞觀初廢入穀熟寧陵二縣後縣人徭賦路遠陳訴積年

至高宗朝復置屬宋州其羅城即古株邑故城是也

渙水在縣北二十九里

穀熟縣上 西北至 本漢薄縣地置於古穀城春秋時為穀丘

亦殷之所都謂之南亳漢於此置薄縣屬山陽郡薄與亳義同字異後漢改置穀熟縣屬梁國隋開皇十六年屬宋州隋末喪

亂縣人劉繼叔戮力固守免陷於賊武德二年置南穀州以繼叔為刺史四年罷以縣屬宋州

渙水在縣南二十八里

高辛故城在縣西南四十五里帝嚳初封於此

下邑縣上西至州一百一十里漢舊縣按魯為楚所滅頃公遷於下邑漢

高祖攻下邑拔之在漢屬梁國後漢無下邑縣魏復立焉晉宋屬梁郡隋開皇三年改屬亳州十六年改屬宋州

故譙城縣北三十一里祖述屯淮陰進據太丘城遂克譙城而居之謂此也

單父縣緊西南至州一百四十九里古魯邑也漢以為縣屬山陽郡後漢以

為侯國屬濟陰郡後魏置北濟陰郡理單父城隋開皇三年廢郡又置單父縣屬濟陰郡十六年於縣置戴州單父屬焉大業

二年廢戴州以縣屬曹州武德五年重置戴州縣又屬焉貞觀十七年廢戴州縣隸宋州漢高祖后呂氏即單父人必子穰巫馬期皆單父

襄邑縣緊東至州一百一十四里本漢舊縣即春秋時宋襄牛地也秦始皇

徙承匡縣於襄陵改為襄邑縣漢以縣屬梁後又屬陳留宋屬譙郡高齊文宣帝省入雍丘隋開皇十六年復置襄邑縣屬杞

州大業三年割屬梁郡武德二年復置杞州以縣屬焉貞觀元年州廢縣隸宋州

睢水西自雍丘縣界流入

承匡故城在縣西三十里

宋襄公墓在縣城中東隅故號襄陵

寧陵縣緊東至州五十九里本漢舊縣寧亦作甯七國時屬魏魏安釐

王以弟無忌為信陵君邑於此漢初以魏咎為甯陵君亦在此漢志寧陵屬陳留郡後漢屬梁國晉屬宋郡改屬譙郡高齊省

隋開皇六年復置屬亳州十六年割屬宋州

睢水西北自襄邑縣界流入

渙水西自襄邑界流入

故葛城在縣北十五里古葛伯國以不祀為湯所滅

大棘故城在縣西南七十里左傳宋華元鄭公子歸生戰於大棘又七國反先擊梁棘壁即此城也

洧陵在縣南二十五里左傳鄭子罕伐宋宋將鉏樂懼敗諸洧陵

故柘城在縣南七十里陳之株邑

故鄆城在縣南五十三里漢之鄆縣鄭伯克段於此

已吾故城在縣西南四十里後漢已吾縣城曹公初起兵於此始基故城在縣南九十里晉豫州刺史祖逖督護衛策所築初

乞活魁遣陳川據陳留浚儀遣將魏碩於穀水南營逖遣策等追戰大破之因即立戍留守策曰從祖公北伐數年功始基於此因以為名

仇留故城在縣南六十五里初陳川自始基敗後遣將仇留伐鄆以逼豫州祖逖遣衛策進戍谷北高丘以禦仇留故呼為仇

留城

亳州

譙郡

開元戶七萬七百三十二

鄉一百三十八

禹貢豫州之域至周不改春秋時為陳國之焦邑六國時屬楚

在秦為碭郡地漢為譙縣屬沛郡初後漢熹平五年黃龍見譙太史令單颺以為其國當有王者興不及五十年亦當復見後

如其言魏文帝即位黃初元年以先人舊郡又立為譙國與長安許昌鄴洛陽號為五都後魏復置南兗州周武帝改為亳州

隋亂陷賊武德四年討平王世充復為亳州

州境

東西三百六十七里

八到

西至上都一千七百二十里

東至東都八百六十里

正南微東至潁州二百六十里

西北至宋州一百四十里

東北至徐州三百九十里

西至陳州二百四十里

貢賦

開元貢

絹二十四

賦

縣

絹

黍稷

麻

麥

管縣八

譙

臨渙

鄧

城父

鹿邑

蒙城

永城 眞源

譙縣

郭下

漢舊縣屬沛郡晉屬譙郡後魏無譙縣有小黃縣隋

開皇三年以小黃縣屬亳州大業二年改小黃縣爲譙縣三年

以亳州爲譙郡縣仍屬焉

渦水在縣西四十八里魏黃初六年文帝以舟師自譙循渦入

淮

魏文帝祠在縣東五里初魏太祖以議郎告疾歸鄉里築室於

此春夏讀書秋冬弋獵以自娛文帝以漢中平四年生於此宅

故梅城在縣南四十里古梅伯國

臨渙縣

西至州

本漢銓縣屬沛郡後漢屬沛國魏屬譙郡

梁武帝普通中克銓城置臨渙郡以臨渙水爲名後魏改爲渙

北縣高齊省臨渙郡改渙北縣爲臨渙縣屬譙郡隋開皇三年

廢郡留縣改置譙州神堯嘗爲譙州刺史大業二年改屬亳州

武德四年屬譙州貞觀十七年廢譙州縣隸亳州

嵇山在縣西三十里晉嵇康家於銓嵇山之下因改姓嵇氏

鄧縣

上西南至

秦漢舊縣屬碭郡漢屬沛郡蕭何封鄧侯卽

此邑也魏鄧縣屬譙郡後魏省隋開皇十六年復置鄧縣屬沛

郡武德四年改屬亳州

城父縣上 西北至春秋時陳國之夷邑亦名城父漢為城父縣屬沛郡後漢屬汝南郡晉屬譙郡宋志闕而有浚儀縣隋開皇十八年以重名復改為城父屬亳州

渦水西北自譙縣界流入

淝水東南至下蔡入淮

扶陽故城在縣東北三十六里漢韋賢封邑

章華臺縣南九里

高陂縣南五十六里周迴四十三里多魚蚌菱芡之利

鹿邑縣上 東至州一本漢蘄縣地春秋時鳴鹿邑屬陳國左

傳晉智武子以諸侯之師侵陳至于鳴鹿是也晉屬陳郡後魏

屬陳留郡隋開皇三年改屬亳州為鹿邑縣

渦水西北自陳州太康縣界流入

鹿邑故城縣西十三里俗名牙鄉城春秋時鳴鹿邑也

武平故城縣東北十八里建安元年漢獻帝以曹公為大將軍

封武平侯以此城為封邑

蒙城縣上 西北至州本漢山桑縣屬沛郡後漢改屬汝南郡

魏屬譙郡後魏孝文帝於此置渦州理山桑城其地後入於梁

梁於此置西徐州後復入魏改為譙州改譙縣為渦陽縣隋改

渦陽為淝水縣武德四年重立山桑縣屬譙州貞觀十七年廢

譙州割屬亳州天寶二年改為蒙城縣

縣城北臨渦水後魏渦州城也東魏武定六年侯景叛行臺慕

容紹宗破景於此

檀公城本漢山桑縣城宋將檀道濟為征北將軍居此因名之

永城縣上 西南至州因隋舊縣本秦芒縣地漢不改後漢臨

睢縣之境晉蕪縣地隋大業六年於馬甫城東北三里割彭城
睢陽置縣遂名永城屬譙郡武德五年移於馬甫城屬譙州卽
今理是也貞觀十七年罷譙州以縣屬亳州

碭山縣南五十里漢高祖隱芒碭山澤間應劭注芒今在臨睢
卽永城縣是也碭屬梁國今碭山縣是二縣之界有山澤之固
可以隱也

故費城縣南二十里

真源縣望東至州五十九里本楚之苦縣春秋時屬陳後為楚所併漢

屬淮陽國後漢苦縣屬陳國晉屬梁郡成帝更名谷陽高齊省
入武平縣隋開皇六年復置谷陽縣理苦城屬亳州乾封元年
高宗幸瀨鄉以玄元皇帝生於此縣遂改為真源縣

寧平故城在縣西南五十五里漢縣地晉永嘉五年東海王越
自陽城率甲士四萬死於項祕不發喪石勒兵追之及寧平城
焚越屍於此數萬眾斂手受害尸積如山王夷甫亦遇害

玄元皇帝祠縣東十四里祠院中有九井隋季井皆竭自武德
已來清泉沁涌或云汲一井而八井水皆動

李母祠在縣東十四里乾封元年冊號先天太后今謂之洞霄
宮

潁州汝陰開元戶二萬八千一百七十九 鄉五十六
元和戶一萬一千五百二十九 鄉六十

禹貢豫州之域春秋胡子國楚滅之秦并天下為潁川郡地在
漢則汝南郡之汝陰縣也魏晉於此置汝陰郡司馬宣王使鄧
艾於此置屯田後魏孝昌四年改置潁州高齊罷州置郡隋末
陷賊武德四年討平王世充於汝陰縣西北十里置信州六年
改為潁州移於今理

州境

東西三百五十七里
南北一百九十六里

八到

西取陳州路至上都一千八百二十里
西北至汴州七百里

南至蔡州三百六十里

南至淮約一百里

東至壽州三百六十里
西北至亳州二百六十里

貢賦

開元貢 絁二十四 縣二十七斤

管縣四

汝陰

沈丘

潁上

下蔡

汝陰縣

上郭下

本漢舊縣屬汝南郡魏文帝黃初三年屬汝陰郡

後魏孝昌三年於此置潁州北齊廢以縣屬汝陰郡隋開皇三

年罷郡以縣屬潁州武德初置信州六年復為潁州縣皆屬焉

淮水西南流入經縣南去縣百里

潁水西北自陳州項城縣界流入伏於城下

汝水西南自蔡州新蔡縣界流入又東南入淮

寢丘故城在縣西北一百二十里楚相孫叔敖將死戒其子請

寢丘之地即此

古任城在縣北一里陳將任蠻奴伐齊於潁水北岸築城以圍

汝陰

百尺堰在縣西北一百里司馬宣王討王凌至百尺堰即此

沈丘縣

中東南至州一百二十六里

本漢寢丘孫叔敖子之封一名沈丘漢

為寢縣屬汝南郡後漢加丘字東魏於此置才州高齊文宣帝

廢州改置襄信縣隋不置縣邑至神龍二年十道使唐儉奏請

分汝陰置沈丘縣

小汝水在縣北

潁上縣

中西北至州一百一十七里

本漢慎縣地屬汝南郡自漢迄宋不改

隋大業二年置潁上縣屬潁州三年以潁州爲汝陰郡縣仍屬焉武德四年移於今理

淮水西南自汝陰縣界流入去縣七十里又東北入下蔡縣界潁水西自汝陰縣界流入又東流入淮

下蔡縣

上西至州二百二十里

本漢舊縣古蔡國又吳州來之邑也按蔡

國本都上蔡又徙新蔡後又遷此故謂之下蔡漢以爲縣屬沛郡後漢屬汝南郡隋大業二年屬潁州十二年移於今理武德四年於此置渦州下蔡屬焉八年州廢縣屬潁州

碭石山在縣西南六十里淮水經碭石中對岸山上築二城以防津要今按淮水以中流分界在西岸者屬下蔡在東岸者屬壽陽

淮水西南自潁上縣界流入

淝水經縣理南去縣一里入淮

碭石城魏諸葛誕反王昶據碭石以逼誕卽此城又晉孝武帝太元八年聞苻堅入寇乃遣龍驤將軍胡彬將水軍五千援壽春旣陷退保碭石亦此城也今之縣城在舊城東北十餘里鄧艾廟在縣西一百二十步艾爲魏將作陂營屯田後人賴其利因爲立祠

元和郡縣圖志卷第七終

